

१०६

दर्ता नं.: ४८/२०७६/७७

पुखां दयक तकागु सम्पति, भीगु कला व संस्कृति
पिकाक-भक्तपुर नगरपालिका



पुखां दयक तकागु सम्पति, भीगु कला व संस्कृति

खबर संग्रह

नेपाल संवत् ११४३ चौल्ला श्व/२०७९ चैत्र १५/ २०२३ Mar./ त्या: ८०, दौँ:५



खबर नगरपालिकां छणिङ्गु फोहोर मुठ कम्पोज्ट
(नेपाली) क्ष: ढयकथाय क्ष: श्वाल

ख्वप नगरपालिकाया रणनीतिक योजनाया प्रतिवेदन ल: ल्हाङ्ग दिल
(२०७९ फागुन ३० गते)



जर्मनया सर्जन डाक्टर पुं ख्वप नगरपालिकाय्
(२०७९ धैत्र ६ गते)



; DkfbSlo

©)&(rश !%, C ^ \$!) ^, jif%

बिस्का जात्रा-शान्तिपूर्वक डायूक्य्

ख्वपया ऐतिहासिक बिस्का जात्रा हनयं वयो च्वंगु दः। श्व नं हाँया नेदा-प्यदा कोरोना भवल्वचं याडः मः काथंजक नखाडाय्के मःगु दुःख ख्वपया जनतां लुममांक नि। उकिं थुगुसीया विस्का जात्रा शान्तिपूर्वक, तस्कं बांलाक न्ह्याक्यता ख्वप नगरपालिकां स्वापु दःपुं नपां च्वड, बैठक तयो छलफल याडः च्वंगु जुल।

ख्वप दे कला व संस्कृतिं जःगु नगर खः। दाच्छी यंकं थी थी जात्रा-पात्रा, नखा-चखा, अनेक पुजा-आजां याडः थुगु नगर छुं नं छुंकाथं ज्या लिइमलाक सकूय जुयो च्वनि। उकीं थुगु नगरता गुलिं विद्वानपिसं सांस्कृतिक नगर, म्वाडः च्वंगु संग्रहालय काथं धायो वयो च्वंगु दः। अथे दाच्छीख्य् वैगु जात्रा मध्ये विस्का जात्राता ख्वपया म्हासिइका व गौरवकाथं कायो वयो च्वंगु दः।

बिस्काया तस्कं स्वयहाँयपुगु जात्रा मध्ये भैलखः लुइगु, ल्योसिंद्यो थानिगु व क्वःथैगु जात्राता कायो च्वंगु दःसा नगरया त्वालय त्वालय विस्कानपां स्वापुदःगु जात्रात नं याई। नगरबासीपिसं थःथाय्गु जात्रा बांलाक्यता थःगु धाय्गु भावनां जाय्क थमनं हे भाला कुबियो याई। भीगु देशयाय्पुं जक मखु विदेशी तय्सं नं तस्कं हाय्पुक स्वइगु अलय तस्कं लयतायो मन हव्यकः स्वइगु बिस्काजात्रा शान्तिपूर्ण ढंगं डायकेता गवाहाली याय्गु सकल ख्वपया जनताया जिम्मेवारी अलय कर्तव्य नं खः।

थौं कन्हे आधुनिक सञ्चार माध्यम च्वजायो वसेलिं थुगु जात्रा हलिमय्या कुं कुलामययाय्पिसं नं प्रत्यक्ष स्वय दयो च्वंगु दः। हलिमयव्याकसिनं स्वइगु विस्काजात्रा ख्वपया थःगुहे पहःया मौलिक जात्रा खः। थुकिता हिलः न्हूंगु हे पहलं न्ह्याक्य माला दक सुभाव विइपुं नं मर्हगु मखु। अलय ख्वप नगरपालिकां थःगु हे पहःया मौलिक परम्परा म्वाकःतयता थःगु सीप व परम्परा ल्यंकः तय्ता स्वापु दःपुं मनूतय्ता बैठक त तं, छलफल यायां अभ बांलाक, स्वय हाँयपूकः जात्रा क्वचाय्केता कुतःयाडः वगु दः।


भैलखः सालिगु दिन सं गुबलें-गुबलें जुइगु छगू नेगू घटनां याडः जात्रा बांलाइ मखुलादक नगरपिनयता मनूतयसं खाँ ल्हाडः जूगु नं न्यनय् दः। अथेमखु धाय्गु खाँ ज्या ख्वपया जनतां जात्रा बांलाक याडः क्यनय् फ्यके मः। ख्वप नगरपालिका, जिल्ला प्रशासन कार्यालय, गुथिसंस्थान, जात्रा व्यवस्थापन समिति पिसं मंकः कुतःयाडः बिस्का जात्रा हलिमयया सकल मनूतय्सं लय्ता प्वंकिगु काथं याडः क्यनय मः। थुगु जात्राया दकलय् तःहांगु लाहा गुथि संस्थानयाय्गु खः। गुथिसंस्थान इलय हे जात्रा न्ह्याक्यगु ज्या याःसा विस्काजात्रा इलय हे तस्कं बांलाकः, सभ्य ढंगं क्वचाई। उकीया निंति सकलसिनं थःथःगु थासं गवाहाली याय्नु।

पिकाक-ख्वप नगरपालिका/सम्पादक-आशाकुमार चिकंबज्जार, डेस्कटप-धन लक्ष्मी त्यात, आवरण सज्जा-रेणु ध्वज्, थाकू- भक्तपुर अफसेट प्रिन्टर्स फोन ल्या: ०१-६६१३०४३, ई-मेल- khwopapau@gmail.com

सचिव लिपाया ख्वप दे

डःयता हाँ रखप दे

- नारायणमान बिजुवर्छे (रोहित)



कथहं

भारतं नेपः या उत्तरी सिमा चिं
ख्य् भारतीय सैनिक चौकीत तयो तःगु,
नेपः या मर्से फुक्क कम्पनी (भारु) कालबिल
याइगु व तयारी सामानत अपः भारतयाय्गु
हे दुकाइगु । उकिया बालागुलिच्चः कुमारता
लाडःच्वंगु दः । व्यापारं शोषण नं जुइ
धाय्गु खाँ वं मथु ।

थुइकः बियगु मतिं प्रेमं कुमार पाख्य
स्वयो धाल-धात्थे हे भारत नेपः स्वयो
उद्योगधन्दा, व्यापार व विकासे हनय् ला
अलय बेलायत व फ्रान्स स्वयो उद्योगधन्दा
विज्ञान व प्रविधि, प्रतिव्यक्ति आम्दानी थी
थी लागाय् भारत तःहांगु देश जूसां अपुं
स्वयो यक्व हे लिपा तिनि । भारत विकासं
मखु राजनैतिक चेतना, बेलायती साम्राज्यवादं

मुक्त जुयगु भारतीय जनताया
इच्छा व अन्तरराष्ट्रिय
परिस्थिति स्वतन्त्र जुगु खः ।
थुकिता भौतिक विकास धाय्गु
स्वयो आध्यात्मिक विकास धः
सा पाइ मखु ।

उगु इलय मर्से या
तःमिपिनिगु छूं छूं व तःतः
हांगु, पसलय् महात्मा गान्धी,
जवाहरलाल ने हरू,
सुभाषचन्द्र बोस यथांपु नेता
तय्गु तस्वीरत तयो तैगु ।
नेपःमि पिन्के आलोचनात्मक
मिखालं स्वयगु बानी विकास
जुय मलानि ।

कुमार व प्रेमया खाँ खं

मेथाय् हे न्ह्याकः यंकय् तांगु खाड २०/२१
दाँति दःम्हा, सिसिमसी धः म्हा, विज्ञानया
ब्वनामि धौभडेल खाँ फहिङ्कः न्यन - 'मखु
छलफलया विषय भारतया लापुँइ पला मतः
सिं विराट नगरं यैं थ्यंकय्गु खाँ खः । उकीं
भीगु खाँ वहे विषय जक यायनु ।'

धौभडेल भाजु त्वालय् फूक्कनपां
मिलय जुयो च्वनिम्हा अलय् सरलम्हा
ल्याम्होचाम्हा मनू खः । नेपाली साहित्य
क्वसाय्क जुइम्हा जूगुलिं वयागु लाहातय्
न्ह्याब्ले नेपाली साहित्यया साफू छगू दै ।
उकीं वं नुवातकीं साफू ज्वडः तः गु जः पागु
लाहा हे सांकिगु ।

तुइगु कमिज व सुख न्ह्याडः तःम्हा
नेपाली काप लकां न्ह्याडः जुइम्हा, न्ह्याब्ले

र्वं नयो च्वनिम्हा माध्यमिक स्कूलया छम्हा
मास्टर स्द्र सायेंजूं धौभडेलया खाँख्य् सहमती
यासेलिं प्रेमं चुरोट फुक्क सालः खाँ न्ह्याकल-
'देया राजनीति खःथाय् लाःसा अथे धाय्
सत्ताय् थ्यंगु पार्टी व नेतातय्के तः व्यागु
बिचः व लिपा थ्यंकया (दृष्टिकोण) बिचः
दःसा भी विराटनगरे ६:०० ता इलय् च्या
त्वङ्डः मोटररथ् च्वनय् सप्तरी या राजविराजे
सुथाय्सिया कौला (ब्रेकफास्ट) नय, जनकपुरय्
थ्यनय वं जानय दथी दथी च्या त्वं त्वं
बहनीया जाः भी ख्वपय छूं थ्यंकः वयो नय
दै ।' बायँ सिंक्वचा छक्वचा कायो ध्वः क्यू
क्यू नेपः या नक्सा दुनयँ विराटनगर निसें
स्वनिगलय तकया लाँ याय्गु नक्सा प्रेमं
च्वतः ।

ब्वनामि मदनं तस्कं लयतायो मन
हवयकः थःगु मनया खाँ तल 'ओहो ! थथे
याय् फः सा यां तस्कं हे बालाई । थुलियाय्ता
हक्नं नेस-प्यस दा बिहला ?

बाँय् क्यूगु व बुलुगु नक्सा व लाँ व
दथी दथीया दियगु थाय् (बिसौनी) ता
सिंक्वचां ध्वः कियो क्यन प्रेमं । अलय
सिंक्वचां च्वयगु त्वः त धाल- 'अहँ, मालि
मखु नेस प्यस दा ? जिं धाय् हे धुन नि
नेतात लिपा थ्यंकया बिचः याइपुं व विकास
याय्गु मति दः पुं जुयमः अजगु विकासता
नीदा-नीडादां हे मजाकं याय्फः । प्रेमं अपुक
हे धाल अलय लाहातय् च्वंगु चुरोट
आच्यावगु पुलांगु धौकला चाख्य् स्यात ।
उगु इलय नेपालय नेपाली कांग्रेस, राष्ट्रीय
कांग्रेस, प्रजापरिषद, गोखाँ परिषद, नेपाल

सचित्र खुगूगु ख्वप पौ. बःछि पौ(पाद्धिक)

कम्युनिष्ट पार्टी, राष्ट्रिय प्रजातन्त्र पार्टीथजगु
राजनैतिक पार्टीत हज्याड़ ज्या साड चंवंगु
जुल ।

रुद सायंजु थःगु कमिजया लचः
भाति भाति च्व छ्या छ्यां लथ्याथ्यां भातिचा
खैला धाय्यें च्वडः धाल - अथे जूसायां
तस्कं हे बालाइ नि, अलय् आपा-आपा जःगु
पहाड पर्वत तछ्याड़ नीदा- नीडादाया दुन्य
गथे छन्हूखं हे मोरडं यें थ्यंकय् फै । प्रेम जी
लासा फय् खः (हवाइ सेवा) या खाँ ल्हाडः
चंवंगु जुई ।

मखु, मखु मार्सापि भीगु हःन्य
दार्जीलिङ्ग उदाहरण दः नि । फुक्क
पहाडता हवखाडः तछ्याड़ यंकय् गु मखु,
पहाडया जां जां हिकुहिकुनं लाँ दय्कः नं लाँ
व रेल हय् फः । भूगोलयाय् खाय्यं कुमारं
थुइक व्यूसा बालाइ- प्रेम थः छखय् लियगु
मतिं धाल ।

खः विराटनगर निसें जनकपुर वा
हेटौडा तक माथांगु जगगा जुग्गिं वा चुरे
पहाडया क्वं क्वं लाँ दय्के फः वनलिं जनकपुर
लिपा चुरे क्वचाई, अंगेजतय्ता लिड़ : छ्वयगु
लाँपुं हे वा सिन्धुली पाखं यें थ्यंकय् ज्यू ।
हेटौडां जूसा महाभारत पहाड जुयो वयमः ।
थुकियाबारे थाय् थासय् भौगोलिक सर्भेनं जयो
चंवंगुदः । कुमारं कान ।

खयां उगु इलय नेपः या तः तः
हांगु खुसीत, पहाड-पर्वत, सहर- बजार
सदरमुकाम, हावापानी व उब्जनीया खाँ
थुइकः बिडगु नेपाली साफूत अपलं म्हवं जक
दता । फुक्क ब्वनामिपिसं नेत्र ब्रहादुर थापां
च्वयो दय्गु बः चा जक हांगु 'नेपः या
भूगोल' ब्वनिगु । कुमार भूगोलया ज्ञान
दःम्हा ब्वनामि खः ।

ल्हवंम्हा अलय् कुर्ता-सुरव फिइम्हा
लकां व न्याकी साकी पसः या कृष्णा
काय्यां अजुचायो न्ह्यसः तल- 'अलय
छु भैसे, भीमफेदी, चित्ताइय् पला

तः वानय म्वला ?

म्वं म्वं, अंगेज तय् सं यां
भीमफेदीपाखं यें तकया चिच्याहाकगु लाँया
सर्भेयागु खः । सुरुद्ग मार्ग, भोलुद्गे ताँ,
व चिच्याचिच्या व्यागु लाँपु ज्यो यलाय
थ्यंकय् गु थन्योगु मेमेगु खुं लाँचा नं दः-
कुमारं कान ।

पसलय् छक फुक्क सुंक च्वंगुलिं
सुनसान जुल । अपुं फुक्कं छन्हूखं हे पूर्व
निसें यें व पश्चिम निसें राजधानी थ्यंकय् गु
म्हागसय् दुवित । अलय् उगु सुनसानता
चिरिफायो धौभडेल लाहा थाडः (अभिनय)
लाहा भाय यायां धाल - अजुचाय म्वः, अः,
थौकन्हे गथे टेलिफोन, बिजुली व रेडियोया
खाँन्यडः भी अजु मचाया अथेहे टिभी नं
भीसं स्वय खानी तिनि । थौं भीसं थूलि
थुलि जा नय्गु घ्यो, डा-ला, तरकारी,
दाल नय्गु कन्हे व फुक्क ल्वाक ज्यागु छगू
हे म्हवचा नयां गाइगु खाय्यवस्तु वै तिनि ।
गथे हि या नसा खय् ग्लुकोज ना: व मेगु
इन्जेक्सन व वास छ्यल: विरामी मथां लांकी,
अथेहे कृतिम पौष्टिक आहारा

वा अथे दयक तःगु नसा
ज्वलं खं भुथुलीया ज्या तस्कं
अः पुक बिइतिनि । नपां
सुन्तला, ओँ व लिचि नं
नय्मालीमखु उकिया रसया
बन्दोबस्त वैतिनी । छगू
दस्यां बिस्कुट नं काय्फ ।
दामी व पौष्टिक बिस्कुट
मेगू देशय् दय्के धुंकल,
२/४ गूं पुरिया बिस्कुट
तहांगु आहाराया ज्या विई ।
अथेहे ला, डा, छ्यें या चुं
नपां चिच्यागवगु बद्वाय तयो
है तिनि: वास चक्की थजगु
वस्तु दयकी तिनी, गथे थौं
कन्हे भीसं पाउडर दुरु व

गोलिटनया दुरु छ्यलः च्वडा । उकीं छगू
छगू विषय दुग्यंकः नुगलाय वाय्क, ब्वडः
न्यड थुइक सय्कः वांसा अजु चाय्मःगु छुं हे
खाँ दैमखु ।

अथे खः सा छु नेपालगञ्जं नं यें
छन्हं तुं थ्यंकय् फैला ? ' मदनं न्ह्यसः
तल । प्रेमं तस्कं गर्व याडः धाल - नेपाल
गञ्जं यें जक मखु, दुर्गम गां, क्षेत्र, जिल्ला
अथेधाय् मुस्ताड, डोल्पा, मुगु, जुम्ला- हुम्ला
य् नपां छन्हूतुं थ्यनि तिनि । रारा व
मानसरोवरय् भी चाहयू वानय् दै तिनी ।
अथेनं अः भीमध्ये गुम्हां फेवाताल तक हे
वानय् मन्यां नी । गुम्हां सिलु थ्यंकः वांपु
दत ।

ख्वपया जनतात सापारुया छुं दिन
हाँ दायँ दायँ पतिकं सिलु वानी, गुगु थौं तक
याडः वला तिनि । अथे हे चोभः, नम्रा,
मनकामना, थजगु द्योथाय् वानिगु परम्परा
नं दहे दः । तःमिपुं मनूत दक भारतया
चारधाम वानी ।


तःतः जःगु पहाड पर्वत, आपा-

सय वर्षपछिको

भत्तपु

सय वर्षपछिको

भत्तपुर



सचिवत खुगूगु ख्वप पौ. बःछि पौ(पाद्धक्षिक)

आपा व्यागु खुसी व हिमाल त्यालाँ कायो
गथे लाँ दय्के फै ? गुब्ले भी रारा व
मानसरोवर स्वः वान्य् फैगु ? शड्काकं
कृष्ण कायष्ठं कपः सांकल ।

हकनं बायं च्वयागु नक्सा क्यं क्यं
ध्वाथुइकेवियगु मतिं प्रेमं धाल - उकी भीसं
पीर छतिं हे काय्म्वः कृष्ण दाइ । ल्व हैं
ल्वहँय पहाड्य् सुरुड मार्ग (हवखाड लाँ)
दय्के फःसा तस्कं काथं मछिंगु थास्य् रज्जु
(रेपवे) मार्ग दय्के फः गनां गनां हेलिकप्टर
व हवाइजहाज सेवा नं दै । उत्तर व दक्षिण
अमेरिकाया दथ्वीया ब्व पानामा धाय्गु
जमिनया चा लिकायो नहर दय्कला, भूमध्य
सागर व रातो सागर दथ्वीया या चा लिकायो
मिश्रमा स्वेज नहर दय्कलासा छन्ह बेलायत
व फान्सया दथ्वीया जलसंयोजक वा जल
मार्गया क्वय लाँ व रेल न्ह्याकीसा नेपःया
चिच्या चिच्या क्वगु थाय् व जिल्लाता
यातायातं मस्वाइगु यां खाँ हे मखु । अःनेप
मिपु नेपालगञ्जं यैं थ्यक्यता भारतया
नानपारा, बहराइच, गोणडा, गोरखपुर,
बगाहा जुयो रक्सौल थ्यनि अलय् रक्सौलं
बिरगञ्ज थ्यनि अलय् वयो राजधानी
थ्यनि । छन्ह भी भारतय् पला मतः सि
देया छगु थासं मेगु थास्य् थ्यनि तिनि ।’
छभा दिडः वं धाल - भारतीय जनताया
सद्भावना त्याकय् फःसा कलकत्ता बन्दर
गाहं नेपःया सिमानाय् नेपः या तराईया छुं
थास्यतक चिच्या - चिच्या गवगु जहाज वा
दुद्गां जलमार्गया ज्या नं काय् फै ।
...उलिजक मखु यैं देया पिसं नैगु जाकी
जुम्लाय्, डा जनकपुरया, सप्तरीया ओँ,
रौतहट्या लिचि, अलय तराईया परवल,
प्यूठानया लैं अलय पोखराया सुन्तला जुइति
नि । अलय् ख्वपया पुष्टकारी व धौ देया
फुककथास्य् थ्यनि तिनि ।

मदन धः सा धैर्यं त्वः त हे न्यडः

च्वन - दथ्वी हे खाँ त्वाल्हाड मनय् वगु खाँ
भासुकः तयो धाल - थवयां स्वप्नद्रष्टाया
स्वर्गलोकया खाँ थे जक च्वनक । छु भीसं
थुकिता म्हागसया खाँ वा गफ जक धःसा
जीला ? अखुनुं छुं दाइपुं खाँ ल्हाडः च्वंगु
एच.जि. बेल्स व लेनिनया । फुकक सोभियत
रुसता विद्युतीकरण बरावर समाजबाद जुइ
धाय्गु लेनिनया विचः खः । उकी एच.जि.
बेल्स लेनिनता क्रेमलिनया स्वप्नद्रष्टा धाला
हैं ।’

व्यापारी युवा भक्त व ल्याम्होचाम्हा
इन्द्रता व फुकक छगु नन्द देशया बाखं थे
जुयो च्वन । उकी व्यापारी ल्याम्हों नं म्हिचां
च्वें, लभं, दालचिनी सुकुमेल, व याला
लिकायो नेपा लाहातय् तयो फुककसिता लाहा
ब्वयकः इडः बियोच्वन । गुम्हासिं लभं,
गुम्हासिं दालचिनी, याला, सुकुमेल कायो
म्हुतिइ तल ।

इन्द्रं विश्वास व अविश्वासया थूचां
क्वत्यय्क च्वम्हा थे जुयो भस्क तयो न्यन -
जूसायां बाला अथेनं भीगु जीवनं थूलि प्रगति
जुगु स्वय खानी मखुला ?’

धौभडेल व कुमारं छकलं इन्द्रता
मनतय्केगु मतिं धाल- आम्या निराशावादी
बिचः जुलक, हरेशचायो, निराश जुयो मनूनं
प्रगति याय् फैमखु । भी आशावादी जुयमः ।
नपां म्हेगः व थौया उपलढीं कन्हेया शुभ
जुइगु खांकय् मः अलय् तर्कया कसीखय्
चुलः स्वय सय्के मः ।

कृष्ण कायष्ठं न्ह्यलः तान - ...
... ‘कुतः वै नय् जक धाय्थे, जुई ।’
त्वाथ्यच्वंगु रवयं व मसला न्ह्यं न्ह्यं फुकक
पक्ष व विपक्षखय् खाँ तयो च्वंबलय् छकयां
हल्ला हे जुल । स्थिति शान्त याय्ता प्रेमं
खल्तीया रुमालं थःगु ख्वालय् हुयो फुककसिता
विश्वास वांकय्ता छगु छगु खाँवः ता बः
बियो धाल- ‘लिपा लाय् फ अलय् पक्का नं

भीगु थवहे मिखालं कलपना याडागु स्वयो
बालागु व मति मतया काथंया खाँ ज्या भीसं
स्वय खानी तिनी । चिच्याहिबलय् भीसं
सिलवत व गवरखय् सलां खं च्वयो पैं क्वाया
च्वसा दय्कः काची भ्वँखय् च्वयो वया ।
अः भीसं मार्कर छ्यलः वया अलय् विदेशी
साफ् व कापी छ्यलः च्वडा । युरोपया
दक्षलय लिपा लागु रुस छगु महाशक्ति दे
जुय तांगु दः, लिपा लागु चीन अःमथां हे
तहांगु शक्ति जुइ । जिं न्हपा नं धाय्धुन
खाली राजनीतिज्ञत कन्हेयंकया बिचः याडः
हज्याय् फःपुं जुयमः ।’

व्यागु खाँन्यड, धौभडेल, रुद्र व
कुमारं खः धायो कप सांकलसा कृष्ण, भक्त,
इन्द्र वाल्ल च्वडः च्वन, ब्वनामि मदन धःसा
अखय् छक थखय् छक स्वयो च्वन ।

छतुं हे पसलय् ज्या सानिम्हा
मिजंमचा द्वाँ वयो धाल - ‘छिकपिन्ता साहुबा
नं पुष्टकारी बियो हःगु दः ।’ थुली धाय्वं व
पुष्टकारीया रिकापी पुककसिथाय्
चाहिइकल । फुककसिनं छगः छगः पुष्टकारी
कायो नल । व मिजंचां रिकापी छाती तयो
धाल - हजुर, जि दुनय् धौ ल्हानय् जिल ।
ई जुल । मखुसा धौ स्यनि । ‘स्थिति थूम्हा
इन्द्रं धाल - कः दाइपुं थौं या भेला थाना हे
क्वचाय् के नु ।’ धौ भडेलं घडी स्वयो धाल
- ‘ओहो ! डाता ई नं जुल ।’ प्रेमनं दान
थःगु पाइन्ट व कमिज मिलय यायां धाल -
‘स्व पासा भाइ पुं भीसं भिंगुम्हागस खानय् ।’
पिनय् स्व स्वं वं धाल - ‘कः व नं दित ।’

अलय् ब्वनामि मदनता उगु चच्छी
बालाक न्ह्यों हे मव । व्यागु मनय् बारम्बार
वहे दुरु - धौ पसः या खँल्हा बल्हा, नेपः या
नक्सा लाँत व जनताया कन्हेया जीवनया
खाँ जक थःगु हनय् भैल प्याखं थे ल्हू वयो
च्वन । अलय् व गुब्ले देना वं चाहे मचाल ।
(आषाढ २०५९)

सुनं थःगु पहः त्वः फिइकि वं फुवक त्वः फिइकगु थें जुई



पुरातत्व विभाग ख्वप नगरपालिकाता नं छु खाँ तय्ता ई ब्यूगुलिं जिं सांस्कृतिक नगर ख्वप पाखं पुरातत्व विभागाया महानिर्देशक जु नपां सकलसिता सुभाय देछायो च्वडा। नपां बैठक तःलायमःदक भिन्तुना नं देछायो च्वडा।

२०७२ सालया तः भवखा ब्वःगु नं न्ह्यदा फुय धुंकल। उलि दुने अपलं निजी छुँत व सम्पदात नं दय्कला, अजनं अपलं छुँत सम्पदात दानय् बाकी दः नि। बैठकं तः भवखाचां स्यंकगु दानय् मःगु सम्पदात ल्हवनय् कानय् यायगु बिषयता मू खाँख्य् तयो खाँ क्वः छिडः व्यवस्थित योजना दय्क मथां ल्हवनय्-कानय् ता ज्याछिकः हज्यायगु लाँपु चाङ्गु आशा याय्।

भी विश्व सम्पदाया धल ख्य नांजगु नगर पाखं थाना प्रतिनिधित्व याडः च्वडा। विश्व सम्पदाय् नां जःगु यैं लायकु, बौद्ध, यलया लायकु, ख्वपया लायकु, चाँगु नारायणया देगः दःगु थी थी थासं प्रतिनिधित्व याय् दयो भी लयताया। थुलि म्हवचा दुरीख्य् थुलि

अपः विश्व सम्पदाया धलख्य् नां जायो च्वंगु सम्पदां जःगु थाय् हलिमय् म्हवजक है दै। अथेनं भीगु सम्पदाया ल्हवनय् कानय् ज्या ख्य केन्द्रीय सरकारं बालाकः बिचः याय् मफूगु दुःखया खाँ खः। अपलं जनसंख्या वृद्धि जुयो च्वंगु, अनियन्त्रित सहरीकरण व आधुनिक विकास निर्माण सम्पदा ल्यंकः म्वाकः तय्ता थाकुयो च्वंगु दः। संघ, प्रदेश व स्थानीय तहया दथ्वी मंकलं ज्या याडः एकीकृत योजना दय्क हज्याय् फः सा जक भीगु सम्पदात बालाक धिसिलाक थानय् फै।

जि ख्वपं प्रतिनिधित्व याडः च्वडा। ख्वप दे ७२ सालया तः भवखाचां अपलं धन-जन स्यंकगु थाय् मध्ये खः। ख्वप नगरपालिकाय् स्यंकगु व थुडः ब्यूगु याडः मुकं च्वाद्रखा निजी छुँत व १३० गू स्वयो अपः सम्पदात स्यंकगु खः।

तःभवखाचां तस्कं स्यंकय् धुंकः २०७४ सालय जिपुं स्थानीय निर्वाचनय त्याकः वाडा। सम्पदा ल्यंकः म्वाकः तय्गु ज्यायाता हदाय् तयो स्यंकः थुडः ब्यूगु सम्पदात ल्हवनय्-कानय् व दानय्गु

नगरप्रमुख-प्रजापति

ज्या न्ह्याका। जिमिगु डादाया दुनय् १२४ गू सम्पदात ल्हवनय्-कानय् व दानय्गु ज्या लगत इस्टिमेट स्वयो अपलं म्हवचा धेबां याडा। जिमिसं स्थानीय थासय् दःगु स्रोत साधनता अपलं छ्यलः थःगुहे मौलिक पहलं स्थानीय जनसहभागितां पुनःनिर्माणया ज्या याडा। थुकिं सम्पदा थःगु नं खः धायगु मति वानिगु, ज्या बालाङ्गु, भीगु थःगु प्रविधि व सीप ल्यडः च्वनिगु नपाँ स्थानीय जनताता ज्या दैगुलि थुगु निर्माण शैली हे सम्पदा ल्हवनय्-कानय् ख्य बालाङ्गु लाँपु खः धायगु जिमिगु क्वचिडा खाँ खः। ख्वप नगरपालिकां थुकिता मदिक्क न्ह्याकः च्वंगु दः। तः तः हांगु भवखाचां न रवतुकय् मफःगु दकलय् तःजःगु डातापोलैं ३२० दाँ निसें गथे खः अथेहे धः स्वाडः च्वनय् फःगु भीगु मौलिक पहया च्वजःगु दसु खः। थजगु सम्पदां फुक्क भीगु मौलिक प्रविधिया उत्कृष्टता ब्वयो च्वंगु दः। महत्वपूर्ण सम्पदा ल्हवनय्-कानय वा दानय् हाँ विज्ञ पुचः पाखं सम्पदाया ऐतिहासिक, सांस्कृतिक व पुरातात्विक महत्वया खार्य अध्ययन प्रतिवेदन व प्राविधिक पितिपाखं विस्कं, प्राविधिक प्रतिवेदन दय्के बियगु वनलिपा तिनि ल्हवनय्-कानय् व दानय्गु ज्या न्ह्याकय्गु याड, वयो च्वडा। थुकिं पुलांगु प्रविधिया खाँ न्हैंग पुस्तां सयकिगु सिइकिगु नपां सम्पदा ल्यडः च्वनिगु जिमिगु विश्वास खः।

ख्वप नगरपालिकां मूर्त सम्पदानपां अमूर्त सम्पदा नं ल्यंकः म्वाकः तय्गुलि बिचःयाड हज्याड च्वंगु दः। दार्य दार्य पतिकं छगू सांस्कृतिक विधाया धिं धिं बल्ला, सांस्कृतिक गुरुपित्ता

सचिवत खुगूगु ख्वप पौ. बःछि पौ(पाद्धक्षिक)

हानय् ज्या व थी थी सांस्कृतिक पुचः पिन्ता आर्थिक अनुदान बियो वगु दः। भीगु भाय् व संस्कृति छाय् मः धाय्गु खाँ न्हूगु पुस्ताता ग्वाकय्गु नं जिमिगु महत्वपूर्ण ज्या खः। उकियालागिं स्थानीय पाठ्यक्रम दय्क छ्वंकय् बिया। भाय् व संस्कृतिया खायै न्हूंगु पुस्ताता छ्वंकय्गु-छ्वनय्गु मयात धःसा व मदयो वानि। छुं नं भाय् व संस्कृति न्हाड वानिगुधाय्गु राज्यया अमूल्य सम्पति न्हाड वांगु खः। उकिता ल्यंकः म्वाकः तय्गु सकलसिया मंकः जिम्मेवारी खः। पुरातत्व विभागं थुकि विशेष पलाछियमः। नेपः या सरकारं पालिका स्तरे भाय् व संस्कृति सम्बन्धी संग्रहालय दय्केगु कुतः याय्मः।

बांलाक विचः याय् मफयो भीगु यकव सम्पदात न्हाडः वानय धुंकल। अजनं गुलि न्हानय्ता च्वडः च्वंगु दः। छगू छगू सम्पदाया छगू छगू ऐतिहासिक, सांस्कृतिक व पुरातात्विक महत्व दः। स्वनिगलय् च्वंगु लिच्छवीकालीन व मल्लकालीन संस्कृति व सम्पदात हलिमय् च्वजःगु खः। ख्वपया चाँगुनारायण, डातापोहँ, डय्डापा इयो, लुँ ध्वाका वास्तुकलाया ल्याखं ज्वः मरुगु सम्पदात खः व स्वयत्ता हलिमय्या दायै दासं लाखौं पर्यटकत वयो च्वनि। पर्यटनया लागा हछ्याय्ता सम्पदाया तः हांगु लाहा दःगु खाँ भीसं लुमांकय् मज्यू। अजगु ज्वः मरुगु सम्पदाया ल्हवनय्-कानय् व दानय्गु ज्या ठेक्का पाखं याकसा उकि भीगु पहः ताडः वानय् फः। ठेकेदारं सम्पदाया मूल्य व महत्व थुइमखु। वं थःगु लबः जक स्वइगुलि ठेकेदारया लबः लिसं भीगु सम्पदा हिल काय् मज्यू। उकीं छुं नं सम्पदाया ज्या स्थानीय जनतापाखं याकय्गु कानुनी बन्दोबस्त याय् मः। अः न्ह्याड च्वंगु आर्थिक ऐन, नियमत सम्पदा ल्हवनय्-कानय् याय्ता पंगः जुयो च्वंगु दः। पुरातत्व थाय्या अध्ययन-

अनुसन्धान ता मदिक्क न्ह्याकय् मः। सिन्धुघाटी, हरप्पा व मोहन्जोदाडोया पुरातात्विक लागाया उत्खननं प्राचीन कालय् आना गजगु नगर योजना दः? उब्लेया वास्तुकला व कला गुलि च्वःज ? आर्थिक व सामाजिक जीवन तपां धार्मिक अवस्था गथे च्वं धाय्गु खाँ थुइके अःपुथै स्वनिगः या लिच्छवीकालीन व मल्ल कालीन सम्पदाया अध्ययन अनुसन्धानं न्हुँ न्हूंगु खाँ सिइकेता अःपुई। भीगु ध्यान अजगु थासय् लाय् मः।

ख्वपया लायकुली च्वंगु कलासंग्रहालय तयो तःगु न्ह्यकं इयो दरवार अजं हे दानय् मफः नि। उकियाय् खायै यकव हे न्ह्यसः थानय् धुंकल। ल्योवगु दसीया लिधंसाय् मल्लकालीन पहलय् दय्केगु खायै ख्वप नगरपालिका, पुरातत्व विभाग व संस्कृति मन्त्रालयया मंकः बैठकं न्हि ल्याः २०७५/४/८ गते हे क्व छिय धुंगु खः। युनेस्कोया अनुमति मरुगु धायो ल्हवनय्-कानय् ज्या गना नं हे हज्याकगु खानय् मरु, छाय् ? देया सम्पदासं पुरातत्व विभागं चासोकायो ल्हवनय्-कानय् ज्या हछ्याय् मःगु मखुला ? फुक्क ज्या स्थानीय तहं याय्गु जूसा पुरातत्व विभाग मःलाकि म्वः धाय्गु न्ह्यसः दाँ वय् फः। दरवार हेरचाह तथा स्मारक संरक्षण कार्यालय, गुथि संस्थानता स्थानीय तहया दुनय्, तय्फःसा ज्या मथां याय् फै।

अः नेपालय विदेशी संस्कृति हाँगः काकां वयो च्वंगु दः। भीगु थःगु पहः ल्यंकं म्वाकः तः तं संस्कृतिया नामय् वैगु बैदेशिक हस्तक्षेप पानय्गु भीगु लागि तहांगु पंगः जुयो च्वंगु दः। सुधारया नामय् याड च्वंगु ज्याखं भीगु थःगु पहःता तप्यंक पंगः थाड च्वंगु दः। मौलिकता भीगु म्हासिइका खः। सुनं थःगु पहः तांकी व थःगु धाय्गु फुक्क फुक्क तांकी। उकीं मौलिक सम्पदा व संस्कृतिया

महत्व ध्वाथुइकिगु, उकिता निष्ठा थानिगु, मौलिक संस्कृति व सभ्यताया खायै ड्वनय्-कुथि व कलेजया पाठ्यक्रमय् दुथ्याकय् मः।

सम्पदा ल्हवनय्-कानय् व दानय्ता मः काथंया सिं अःपुक बिय्गु, जनसहभागितासं सम्पदात ल्हवनय् कानयता मः काथं ऐन, नियम दय्केगु, स्वंगू तहया सरकारया दथ्वी मंकः कुतया संयन्त्र दय्केगु, व स्थानीय सीप व प्रविधिया विषय अःपुक तालिमया बन्दोबस्त याय्गु, नपां भीगु हे पहलं छैं दानि पिन्ता अनुदानया ब्यवस्था याय्गु कानुनी बन्दोबस्त याय् फःसा भीगु सम्पदा ल्यंकः म्वाकः तय्ता ग्वाहाली जुई।

ख्वप नगरपालिकां सम्पदा ल्हवनय् कानय् ख्य् आर्थिक अनुशासन, मितव्ययिता व पारदर्शिताता विचःयाडः ज्या न्ह्याकः वयो च्वंगु दः। मः काथंया जनशक्ति ब्वलांकय्ता इलय व्यलय सिं कःमि, डकःमि, ल्वहँकःमिया तालिम ब्यू ब्यूं वयो च्वंगु दः। अथेहे पुलांगु नगर क्षेत्रे भीगु थःगु हे पहलं छैं दानिपिन्ता हःनय् मोहडाय् सिं, अपा, पोहँअपाया तुक्व धेबाया ३५ प्रतिशत अनुदान ब्यू ब्यूं वयो च्वंगु, ख्वप देया पुलांगु शहरी क्षेत्र दुनयै स्थानीय जनतांजक छैं बुँ न्याय् दैगु कानुनी बन्दोबस्त याय्गु कुतः याडा। अलय उकिया लागिं अदालत तं पंगः जुयो बिला। देया महत्वपूर्ण सम्पदात ल्यंकः म्वाकः तय्ता सम्पदात दःगु महत्वपूर्ण लागाया जग्गा न्याय मिय याय्ता पानय्गु कानुनी बन्दोबस्त याय्ता व स्वनिगःता सांस्कृतिक केन्द्र काथं हछ्याय्ता कुतः याय्ता नं विशेष इनाप याय्।

(स्वनिगः विश्वसम्पदा स्थलया संरक्षण नपां ब्यवस्थापन विषयसं चैत्र ९ गते जूगु इन्टरनेशनल साइन्टिफिक कमितिया बैठक उलेज्या ज्या इवःसं ख्वप नगरपालिकाया प्रमुख सुनिल प्रजापतिजुया न्वचु)

पुँजीवादी समाज व उपभोक्ता मिं यायगु नह्यसः

विवेक

१५ मार्चता विश्व उपभोक्ता दिवस काथं डायकी । नेपालय् नं नेगू प्यंगू उपभोक्ता अधिकारीवादी दाबी याइपुं संघ संस्था तयसं थी थी ज्या इवः त तयो उपभोक्ता अधिकार दिवस डायक च्वंगु बुखाँ प्याहाँ वल । उपभोक्तापित्ता थःगु अधिकार छु खः धायगु खाय॑ सचेत याडः कानुन व्युगु उपभोक्ता अधिकार छ्यलय्गुलि धःसा अधिकार कःमित तः लागु खानय् मरु ।

पुँजीवादी व्यवस्थाय् लबः या निंति व्यापारीत व उद्योगपतियसं शोषणता ज्या भः थे छ्यलः च्वंगु दः । शोषण याय् मफूसा पुँजीवादी व्यवस्था ल्यडः च्वनि मखु । अथे धायगु पुँजीवादी व्यवस्थाया प्राण धायगु हे शोषण खः । शोषण छु भाति मनू तयके जक सम्पति मूँ वांक्यगु ज्या याई । शोषण याडः हे लाखाँ करोडौं मनू तयगु सम्पति स्वयो अपः छम्हा मनूक्य् सम्पति मुनय यंकी । थव हे पुँजीवादी व्यवस्थाया विशेषता खः ।

पुँजीवादी व्यवस्थाय् उपभोक्ता तयता मिखा पिइकेगु वा शोषण यायगुता पुँजीपतिवर्ग थःगु अधिकार भः पिई । पुँजीपतित थःगु उद्योग धन्दाय ज्यामितयता शोषण याई, व्यापारीतयसं खःसां मखुसां कृतिम अभाव दयकः हाकु व्यापार याई । छ्यासा दःगु सामान, म्याद फूगु सामान वा वासः मियो वा धः ख्य् मगाकः बियो लबः नई । चां चां तःमि जुयगु मति अमिसं उपभोक्तातयता भिं मजुइगु न्हयागुनं ज्या यायता लिफः स्वइ मखु । लबः जक दइगु खःसा अमिसं विष हे मियता नं लिफः स्वइमखु । थमनं मियागु बस्तु वा सेवाखं उपभोक्ता पिनिगु स्वास्थ्यख्य् गुलि बाँमलागू लिच्चवः लाई, गुकाथं स्यनि धायगु खाय॑ अमिसं छु हे बिचः याइ मखु । अमिसं लब जक दइगु खः सा न्हयाथिन्योगु मज्यगु अनैतिक ज्या व अवैध ज्या यायता नं लिफः स्वइ मखु । सरकारी अनुगमन संयन्त्रतनं मिखा तिसिड जुइ, खःला खः थे जक जुई । व्यापारी तयसं आना अनुगमन यो वै पित्ता घुस नकां जिलाला, मे मेगु नातां क्यंकां जिलाला ठिकक्चा याडः तै अलय अपुं छतिं हे मरयासी' उपभोक्ता ठाग्य् यायगु ज्या भन भन अपः याडः है ।

शोषण याडः हे अकुत सम्पति मुनय फैगु खः । सम्पति मुनयता व्यापारी, पुँजीपति व उद्योगपतित जक मखु

लिपाया परिस्थितिख्य् नेपः या राजनीति कःमितनं उलिहे मन तयो हज्याडः च्वंगु दः । राजनीति सेवा भावं ज्या सानयगु स्वयो नं पुँजीवादी राजनीतिकःमिपुं चुनावय् अपलं धेबा खर्चयाडु चुनाव त्याक्यता वसां निसें हे ध्यान तयो अजगु ज्या साड, जुई । नेता व मन्त्री जूपिसं नं राजनीतिता नं व्यापारे थे धेबा कमेयाय्ता राजनीति जुयागु जक हदाय तयो ज्या सानी । थःगु पार्टीया सिद्धान्त, विचः, मूल्य व मान्यताता ध्याक्वचाय् तयो सांसदज्यूपुं मन्त्री जुयता ढ्वं ढ्वं जुई । अझ अपलं बजेट दःगु मन्त्रालय लाक्यता पार्टी नेता तयगु छुँ छुँ वाडु चाकरी याडु जुई । निर्वाचन हःनय हे पार्टी त्वःत मेगुपार्टी द्वह वाडः उम्मेदवार जुयो चुनाव ल्वाइगु, थः ता टिकट मबिलादक पार्टी हे तछ्याइगु नपां थःगु हे पार्टीया उम्मेदवार पित्ता बुक्यता जुइगु, थव फुक्क राजनीतिता ध्यावानपां स्वाडः स्वयो च्वंगुया लिच्चवः खः ।

थव लिपाया निर्वाचनय् त्याकः वपुं संघ व प्रदेशया सांसद पुं स्थानीय तहया पदाधिकारीत मध्ये गुलिं भ्रष्टाचारी, शोषक व तस्करनं दः । निर्वाचन क्वचाय् धुकानं सरकारतक हे निःस्वानय् मफःगु थव म्हवचा इलय सांसदपुं स्थानीय तहया पदाधिकारी पुं नगर प्रमुख/उपप्रमुखपुं तःम्हा हे भ्रष्टाचार मुद्दाय् लाडु निलम्बन जूगु दः । अपुं मध्ये गुलिं पहुँच दः पिसं सफाई काई तिनि अलय् सजाय् हे याय् धः सां नं माफी बिइकी तिनी । थव व्यवस्थाय् पुँजीपतिवर्गता न्ह्याकातं जूसां ग्वाहाली याई । थः म्हा छम्हा मनू त्वःतक्यता संसदं न्हगु कानुन दयके बियतानं पुँजीपतित लिपा लाई मखु । संसद धायगु पुँजीपति वर्ग यागु न्ह्यागु ज्यायाता बैधता बिइगु थाय् जक जुयो बिई ।

पुँजीपतित मरुसा पुँजीवाद म्वाडः च्वनय् फै मखु । उकीं पुँजीपति वर्ग देशभक्त, इमान्दार, व क्रान्तिकारी कम्युनिष्टतयता नं थः पुं थे हे पुँजीवादया सब कायक लय तायगु स्यनि । क्रान्तिकारी विचः व सिद्धान्तता क्वः थयता कुतः याडः जुई । अः सरकारे वांपुं एमाले, माओवादी थजगु पार्टीका नेतातयगु बोली व व्यवहारत छु नेका व राप्रपा थजगु पुँजीवादी पार्टीया नेता तयगु खाँ स्वयो पाःला ? थः पुं कम्युनिष्ट जक हः जुइ पिसं नपां पुँजीपति वर्गया व्यवहार याडः जुयगु धायगु पुँजीवादया हः नयँ कपः क्वच्छ्यगु हे खः ।

सचिवत खुगूगु ख्वप पौ. बःछि पौ(पाद्धिक)

थुकाथं स्वयबलय् नेपाली कम्युनिष्ट त्रिक्यता पुँजीपति नेतात तः लागू हे खानय दः।

नेपालय् न उपभोक्ता हकहित ल्यंकः म्वाकः तयता नेपाल मजदुर किसान पार्टीया नायो भाजु नारायण मान बिजुक्छें जु थौ स्वयो थ्यं मथ्यं नीदा नीडादा हाँ हे संसदय् तः क हे उपभोक्ता संरक्षण विधेयक पेश याडः द्यूगु खः। अलय पुँजीवादी पार्टी तयसं उकिता पारित मया। अः उपभोक्ता संरक्षण ऐन २०७५ छ्यल च्वंगु दः। उगु ऐन गुणस्तरीय बस्तु वा सेवा ल्यय्गु, सेवा अःपुक काय्गु, मू व ल्या (परिमाण) थुइके दैगु मन्या जिवय् मनिनिगु स्यंकिगु छु खः धाय्गु थुइके दैगु, कानूनी कार्बाही याय् दैगु अधिकार छम्हा छम्हा उपभोक्ता पिन्ता बियो तःगु दः।

उपभोक्तापिन्के कानुनया ज्ञान मरुगुलिं मिखा पिइके बियमःगु थौं या धात्यें खाँ खः। छु नं कानून अथे हे छ्यलय् वैगु मखु। कानुनया छ्यला सचेत नागरिकं छ्यलतानि तिनि जुई। नागरिकं अः छ्यलः च्वंगु कानुनया खायें सचेत जुयो छ्यलय् अदालत वा स्वापु दःगु निकाय मवांसा कानूनय् च्ययो तःगु अधिकारत जनतां छ्यलय् दै मखु।

बजारय् मियो तःगु वस्तुत व सेवाया आपूर्ति मूल्य, भिं मभिं (गुणस्तर) लामला (नाप-तौल), लेबलया खाँय इलय-व्यलय नेपालया सरकारं अनुगमन याय मःगु खः। मिलय् व खः ला खः जक जुयोच्वना। गुलि दुर्यंकः अनुगमन याई उलि हे उपभोक्तापिनिगु हक (सुरक्षित) ल्यडः च्वनि। ऐनय् संघ थःगु हे संयन्त्र दयकः अनुगमन याय् फैगु व स्थानीय तहं नं अनुगमन याय् फैगु व्यवस्था दः।

ऐनया दफा २८ खय् स्थानीय बजार अनुगमन समिति गठन याडः वस्तु वा सेवा थ्यंकः बियगु, उकिया मू भिंगु, बालागु खः मखु स्वयंता स्थानीय पालिकां अनुगमन समिति निःस्वानय् फैगु कानूनी व्यवस्था दः।

कृषि प्रधान देशय् देसी सः मरु। उकिया मू थः यत्थें कायो च्वंगु दः। किसानतयसं इलय हे सः काय दैगु व भिंगु-बालागु देसी सः काय दैगु किसान तयगु मौलिक अधिकार खः। अलय सरकारइलय् हे सः हयो बिय मफौगु जक मखु थः यत्थें सः या भः तयो मियो च्वडा नं व्यापारीतयता छु नं कार्बाही याय् मफः।

आधारभूत शिक्षा अनिवार्य व निःशुल्क नपां मा.वि. तरिं नं निशुल्क, आधारभूत स्वास्थ्य उपचार नं निःशुल्क, यचुगु त्वनय्गु नाः त्वनय् दैगु, यचुगु लक्षसय् म्वाय दैगु थजगु

विषय फुक्क नेपाली नागरिक - पिन्ता संविधानं बियो तःगु मौलिक हक खः। अः नेपःमिपुं शिक्षा व स्वास्थ्य उपचारया निति अपलं थिक्य् याडः धेबा पुलः काय् माल च्वंगु दः सा त्वनय्गु नाः व यचुगु लक्ष संविधानया पानाय् जक खानय् दयो च्वंगु दः। थ्व फुक्कया लागिं मू खाँ धाय्गु हे नागरिकया सचेता खः। गुम्हा नागरिक सचेत जुइ व दक थःगु अधिकार छ्यलय् फै।

त्वनय्गु नाः इडः मब्यूसें हे धेबा काक्यगु, बिजुली मवबलय्या नं धेबा काक्यगु छ्या काथं अन्याय् हे खः छु नं संस्थां सेवा वियागुया पलि व शुल्क काङ्गु खः। नेपः मिपिसं दां दां तक हिती नाः मवसां बिजुलीया लोडसेडिड जूसां नं धेबा मपूसे मगाडः च्वंगु दः। थुकिया खायें उपभोक्ता ऐन काथं स्वापु दःगु निकायता विपक्षी दयकः ज्वगु मुद्दा दर्ता जुला ? अः तक न्यनय् मरुनि। थुकिया धात्येंगु खाँ अदालतय् जुइगु ढिला सुस्ति खः मुद्दा दर्ता यागु दां दां बिडा नं उकिया निपं (निर्णय) बिइ मखु। अथय् याडः च्वनय्गु स्वयो बरु सुकः च्वनय्गु हे बालाइ धायो जनतात सुकः च्वडः च्वंगु खानय् दः। ठेकेदारपिनिगु लापर्वाही खं थाय् थासय् लौं-ताँ अलपत्र याड त्वः तः तःगु दः। ठेकेदारपिन्ता कार्बाही याय्गु पलि भन म्याद ताडः सरकारं ठेकेदारपिन्ता भुरी भरय् याक च्वंगु दः। वयागु अजगु ज्याखं गुलिसिनं दुःख सिला, राज्यं गुलिक्षति कुबिय माला धाय्गु खायें सरकारं गुब्ले बिचः मया। उकीं पुँजीवादी व्यवस्थाता पुँजीपतिवर्गया सञ्चालक समिति जक नं धाईं।

स्थानीय तहता अधिकार ब्यूसेलिं गुलिं स्थानीय तहं बजार अनुगमनता बालाक न्ह्याकः ज्या साडः च्वंगु दः। अनुगमनया इवलय् नय मज्यगु अखाद्य वस्तुत ल्वाक छ्याडः तःगु, धः तालाजु नवीकरण मयागु, म्याद फूगु सामानत भियो, च्वंगु, पसः फोहर जूगु, थजगु उपभोक्तातयता मभिनिगु ज्या खाँत खानय् दःगु जुल। उपभोता पिनिगु जिवय मनिड स्यंकिगु वस्तुत धू याडः अजपुं व्यापारीतयता कार्बाही नं यागु दः।

धात्ये खाँ यां उपभोक्ता थः हे सचेत मजूतलय् थजगु मज्युगु ज्या याडं तुं च्वनितिनि। उकिता पाडः तयता मदिक्क अनुगमन याडः कडा कार्बाही याय्गु नपां उपभोक्ता तयगु सचेता मदयकः मगा। अन्तराष्ट्रिय उपभोक्ता अधिकार दिवसं नेपाली उपभोक्तापिन्ता सचेत याय्गु सन्देश व्याक्यता ग्राहाली याइगु आशा याय् छिं।

पहलवान व महात्मा

छगु समये छथाय नांजाम्ह पहलवान छम्हसिया देश विदेश वना पहलवान ल्वायगु मति तया लंय वया च्वंबले छम्ह महात्मा नाप लात। महात्माया धासा छथाय फलेचाय् च्वना धुनी च्याका च्वं च्वन।

“का महाराज, भी निम्ह परदेश चाह्यू वने मज्यूला ?” पहलवानं धाल।

थव ख्यैं महात्मायानं चित्त बुझे जुल। “का, ज्यू, चाह्यू वने।” ववं ववं छथाय थ्यंवले इपीं छगु अदभूतगु देशे लावन। जुया च्वंगु छु घासा व देशे ध्यः व सकिया वहे भा जुया च्वन। उलि दंक ध्यः नये दसेलिं सुनां सकि नईगु ? पहलवानया ला “ध्यः हे नयेगु। ध्यः हे नयेगु।” धका अनहे देशे तुं च्वन॥ न्हिथं यक्व यक्व ध्यः डयाना हईगु खुव ध्यः नया पहलवान या व्यायाम याना च्वन। उखे महात्मा वावाया नं ध्यः दं धका खूब ध्यः नया च्वंगु पचे मज्युया प्याहां जुजु लिमला।

“का नु थव थासे च्वनां मंजिल” धका महात्मा मेगु देशे वनेगु धका ख्यै न्हिथान अर्थेसां पहलवान गनं माने जुई वया ला दंक ध्यः धक्का तया च्वने दुगुलिं व थाय तोत वनेगुलि सहमत मजुल।

“आसे, बाबा, जि ध्यः भति नये मगानी मेथाय थुलि दंक ध्यः नय खनिला ?” धका बावाजी नापं मवं। छ्याय, बावाजी याकचा हे मेगु देशे वनेगु धका थःगु सामान ज्वना वन। अथे वने न्हापा है व महात्मां धाय छपु पहलमानयात विया थकल।

“का, स्व, छन्त छुं आपत विपद जूसा थव धाय निभाले क्यना जितः पुकार या जि थ्यंकः वय धका व धाये पहलवान यात विया थकल।

छन्हु पहलवानया त्यंक नया छथाय

लंय् तुं गोतुला द्यना च्वन। उथाय न्ह्योने जुजुयागु तःखागु छे छखा दयका च्वंगु जुया च्वन। संयोग, वहे लंय छम्ह वांलाम्ह मिसा छम्ह सरा-सर वया च्वंबले व छे दना च्वंम्ह दकमी दाजुया वहे मिसा याके मिखा वना व्युगुलिं छे दयका च्वंगु वेको जुया वःगु होस मन्त। उखे व मिसा लंय वया च्वंबले जतारम्ह पहलवान खाना ग्याना अनहे तुं छथाय दिना च्वन।

उखे जुजुया छे दंथाय स्वःवबले अंगः बेकोगु खना दकमी दाजुयात साप है न्वात।

“गथे, नायः, अंगः घेचुला च्वंगु नं होस याय म्वाला ?” जुजुं डयन।



“थव जिगु भूल मखु, महाराज, हुं लंय वया च्वंम्ह मिसा याके छको मिखा वना स्वया च्वनागुलिं अंगः भतिचा ध्यच्चुगु खः।” दकमीं धाल।

“का अथे खःसा व दना च्वंम्ह मिसायात ज्वना हीं” जुजुं हुकम जुल व मिसायात जुजुयाथाय न्होने हल। वैत नं वहे दोष बिल।

“मखु महाराज, लंय वया च्वनाबले हुं तःग्वाराम्ह पहलवान छम्ह द्यना च्वंगु

खना ग्याना थन मवेंसे दना च्वनागु खः जिगु छुं दोष मदु” धका व मिसां विन्ति यात।

“अथे जूसा, व पहलवानयात ज्वनाही वैत स्याके छोयेगु जुल” जुजुं हुकुम बिल।

पहलवानयात ४-द म्ह मनूत वना ज्वना स्यायेगु धका स्यायेगु थासे यंकल पहलवान ला एकास्सी ग्याना छुयाय छुयाय जुल। उगु बखते वं न्हापायाम्ह फकीर छम्हसिनं ब्यूगु धाय छपु निभाले तल। थुखे पहलवान छम्हसित यःखाया स्याइगु जुल धका हल्ला जुसेलि धमाधम अन थासे मनूत मूं बल। लस्कर जाया बल।

उबले लाक्क हे व फकीर बाबा अन थासे थ्यंक बल वं विया थकुगु धाय, छपु निभाले क्यनेवं तापाकं हे वं सिका काल पहलवानयात यःखाना स्याईन धका उकिं अन हुले ख्यतु ख्यना यःखाई थासे वना धाल, आम पहलवानयात स्याय मते। वैगु थासे जि यःखाया सिई थन। छाय घासा थौया दिने थव थासे थवहे घडी यः खाया सीम्ह मनू लिपा चक्रवति राजा जुया वनी धया तःगु दु। उकिं जि हे यः खाया सिई”

राजाया मने थः हे नं चक्रवति राजा जुई दःसा ज्यू ध्यागु लालच जुया बल।

“म्वाल, सुईतनं यःखाय मते। जि हे यः खाया सिना वने” जुजुं हुकुम जुल। थुगु प्रकारं राजा हे यःखाया प्राण त्याग याना बिल।

“खला ? जिगु बुद्धी याना छंगु ज्यान बचे जुल छंगु बल दयां छ्याय ? धका व पहलवानयात बुद्धी बिया इपिं डिम्ह अनं सरासर ल्याहां बल।

उलिचिया बाखं थुलि नेपाया पुलांगु बाखं पाखं

घोषणा आतुर सः

कवि पूर्ण बैद्य

लुखा मदुगु
भीगु वर्तमान थव
(पिनेया निम्ति)
जब्बर सिमेन्तया छधी
मानो लहानाच्वंगु छखा छुँ दुने जि
परिधि परिधिया जालय् थें
जि हे छगु परिधि थें
सूर्य, चन्द्र कां जूगु थव थाय्
चां ल्हाःगु पिरामिड दुनेया
खिउँग दुने जि ।
जि दुने -
ख्वाउँक ख्वःगु हिमाल
थः नाया नं छुं यायेमफुगु हिमाल
द्वलंद्वः न्यातपौ
बन्धित जि दुने
द्वलंद्वः अरनिको हत्या जि दुने
द्वलंद्वः बुद्ध्या भ्रुण हत्या जि मिखाय्
फय् मदुगु
जिगु आकाश
(म्वायेया निम्ति)
चट्टान दुने -भी

खने मदुगु आकृति शहर
ताये मदुगु सः लहर
इमाया बथानय् ।
जिगु धर्मात्मा व दानी
जुये फुपिंथाय् न्ह्यः ने
थःगु तम्ह मनू
स्वपलाः काः वयाच्वना जि
न्याय व अधिकारया नामय्
बामन थौं ।
थव अघोषित लूट
थव अघोषित हत्या
बेक्वःगु तराजुया कम्पातय्
यगगाना वयाच्वंगु भेल्ला
चां तज्यानाः
बक् तछ्यानाः
थः त थंवयाच्वना
न्ह्यातः पिनिगु मिखाय्
फुत्कय् जुयाः छापय् जूगु छक्वः आखः - विरोधया
न्हाय्पनय् स्वां पूगु कम्पित खँया-निषेध सः
घोषणा आतुर !

(सितु २१:१०८८)

इनाप

ख्वप नगरपालिका पाखं पिथाड़ च्वंगु ख्वप पौ बः छि पौ ख्य बांलागु च्वसु
त बियो र्वाहाली याड दिसँ । उगु रचनाया ल्य ज्या याड पारिथ्रमिक बियगु
खाँ ख्वप नगरपालिकाया २०७७ श्रावण २६ गते च्वंगु बैठकं
क्वः छ्यूगु खाँ ब्याक च्वडा ।

सम्पादक
ख्वप पौ

लोक साहित्यः धिसिलाक ब्वयो तःगु रव्वःपा



लोकय् वं वयाता वं वयाता काँ कां
वहे इवलय लोकया सलं हालः वयो च्वंगु
साहित्य लोक साहित्य खः। लोक साहित्यया
लिधंसाय म्हेंगः अजिं छ्य् छुई पिन्ता बाखं
काडः हायँपुकल। बाज्यां भजन न्यकः
ज्ञानरुणया खाँ कान। अलय् ल्यासे ल्याम्हो
पिन्ता लोकम्यै हायकः प्याखं ल्हइकल।
समाजय छगू काथंया ज्या साडः नैपुं
ज्यापुज्यामि वर्गया ब्वनय् कुथि थें हे जुल,
लोकसाहित्य।

लोक बाखं: पुनखुमैचायम्हा ध्वं
च्वलयचा थजु वा सिन्हंपता मयजुया यौवनया
जासे वगु वाखं थजु छगू काथंया पत्यायाय्
थाकुगु बाखंचु दुनय् मिखा तिसिड, मनया
खापा चायकः, ज्ञानया मता च्याकी। चमाजुं
पुनखूँ मैं चाय्ता यागु अपमान हिल वाडः
लाखे लसिंया छुँ वाड नं हिरा मोती ज्वडः
व बलय् नुगः मूम्हा चमाजुं थः म्हयायतान
कायके छ्व बलय लाखेलसीं नं स्याड नः
गुलिं ई कुम्हया घचा थें चाचा हिल वैगु
खाँया सत्यता नपां 'हेला यातकिं छन्ह
मखुम्हासिया पञ्जाय लाई धायगु सन्देश नं
क्यं।

अलय् सिन्हंपता मयजुया बाखं दुनयै
दुवाल, स्वबलय् आना वैपुं मानवेतर पात्र
चकुचा, बखुं, क्वः अलय इहिपा याम्हा छुं
राजदरवारय् ब्वडः यंकगु गुढ खाँ दुनय
छन्ह सर्वसाधण मनू नं राजदरवारे थ्यनि

धायगु संकेत खःला ? स्वयगु मिखालय भर
परय् जुई। छुँ नपां या इहिपा जुयो मचा
बुइकगु खाँ दुनय वैज्ञानिक सत्यता मालयगु
खःसा उब्ले सर्वसाधारण जनतात छुं बराबर
हे खः। अलय वयागु बुद्धि व दरवारय्
थ्यंगु खाँ स्पष्ट मंजूसां थव रहस्यया खाँया
बस्ती तछ्याडः बस्तीपु काय सय्केगु ज्या
अः न्हुगु पुस्तां या सा बांलाई गनां सामन्त
युगय् राजनीति खाँ दुथ्याकय् मजियो जक
थये प्रतीकात्मक बाखं कडः तकलाला ?
अनुसन्धान या: सा बांलाई।

तिंकः वानिम्हा लतमां चायगु बाखं
दुनय् लोभं लाभ, लाभं बिलाप जुइगु नपां
बुद्धिं लाखे - लसिंता नं स्याय् फः धायगु
धापु दुनय् नं जनताकप् बुद्धि मरुसा व लाखे
लसिं (सामन्त) तय्सं भीगु ला-हि: नैगु खाँ
काडः अमिता लतमां चाय् जहानं थें बुद्धिं
जक स्याय् फैगु जान नं बियो च्वंगु दः।

गुलिं बाखांत आशिलतात्या लाम्फो
छायो तःगु दै। गुलिं मनोरञ्जनया बाखंचु
छुडः तःगु दै अलय अपलं जुजुपिनिगु
कुकर्म्याडः दे दुबय् जुगु खाँ तयो शासक पुं
गतिमलासा प्रजां दुःख सिइगु खाँ नं धायो
वांगु दः।

लोक बाखं दुनय अपलं मिथक,
किम्बदन्तीत दुथ्याक :तःगु खानय् दः।
अपलं लोकेबाखं वा मिथक दुनयै ईश्वरीय
शक्ति नपां अपलं थःता मनूनं दुःख व्यूसा

आशा कुमार चिकंबर्जार

वाता भगवानं दुःख बिइ धायगु भावना नपां
पाप धर्मया अमूइ लाडः थुगु जूनि मखुसां
मेगु जूनि दुःख मस्सूरे मगा दक विश्वासया
द्वकलं तपुयगु ज्या याडः वगु खानय दः।
अलय नखा चखा, जात्रा-पात्राया बारे नं
छगू नं छगू बाखं, मिथक वा किम्बदन्ती
मरुगू सायदै दै हे मखु। गथेकी बिस्का
जात्राया भैलय्यो बेतःद्यो नकिंजु अजिमा,
ल्योसिंद्यो फूक्क फुक्क छगू छगू किम्बदन्ती
ज्वडः विश्वासया खापा चायकः संस्कार व
सांकृति कः घाड च्वनि। छगू लोक संस्कृति
ज्यो।

अथे हे लोकम्यै गुकी छपु उब्लेया
बाखं दः। सितलामाई, साँदेशया म्यै,
शिलुतिर्थया म्यै काल जेयी म्यै त खः। तः
कै वै दक कचिमचा वाक्य छ्वम्हा स्वामि
जुजु, साँदेशय वांम्हा थः ज्यानपासां मखुगु
खाँ ल्हाडः सती छ्वगु घटना, शिलु वांम्हा
मिसाता जुजुं लयो यंकगु अथेनं दुनियाँया
साधारण मनू दरवारय् च्वनय् मछुसें थः
स्वामि (मिंज) नपां तिडः वगु बाखं चु दुनय्
जुजुपिनिगु अत्याचारया संकिपा थें खानय्
दः। वहे अत्याचारया बाखं म्यै दु ग्यक
हाली, छगू सः राजतन्त्रया विरुद्धय। अथेनं
कतया जालय् लाम्हा डाथे सर्वसाधारण
जनताया स्या नुगः या सः जक ज्यो हालः
न्यकः न्हुगु पुस्ताता त्वः त वान। अः धःसां
वनं त्व फिल हे धः सां मपा।

सुथाय् दाफा भजन हाली। चुरोट,
बजां सालः थःलिसिं नुगु खाँ नं ब्वयकी।
भावभक्ति, प्रशस्ति, पूर्वजन्म-पुनरजन्मया
खाँ कुलः सुजद्यो घुसी लुइकी, बन्ही धलचा
भजन हालः चा बाबु वांकी। वहे म्याद फुगु
तमसुक अलय ई फुय् धुगु वास थजगु लोक

सचिन्तन खुगूगु ख्वप पौ. बःछि पौ(पाद्धक्षिक)

भजन दुनय् दुःख तांक बिया दक द्यो याय् के
फवनी। नुगः जायकी अलय दुःखया प्वः
झ्यातुकः सः कुबियो जूर्थे जुइ पाहिल जूसां।
व झ्यातुगु कु वं गनानं दिक्य् फैमखु। अथेन
दुनुगलं निसें हाली

‘थथिं जःगु रसरंग त्वल ताव’

राम हँ जी गना वानय ?

खः, थुकि रसरद्ग स्वयो थःगु दे त्वः त
वानय् मगु थें तःहांगु दुःख मरुगु भाव धःसा
दुनय लाडः च्वंगु दः। थव हे खाँ कुल बिय
फःसा लोकम्येंया अध्ययन न्हांगु काथं न्ह्याइगु
विश्वास याय् छिं।

असारया रतिरागात्मक म्यें थजु
गुन्हीपुन्हीया हिसी ख्याली व ध्याचू थजुयो
ब्यू, मोहनीया मालश्री, अलय् वसन्त होली,
धातु फुक्क फुक्क ऋतु नपां मन्, अलय
ऋतुया सोमाचाय् लोक म्येंया भ्यात थवं
तयो मंतामा कछिचां थवः थाडः छगु काथेया
चकांगु खवः ब्ययो हाली-

‘स्वं धाय् गु वसन्तया इलय् जक हवई’
मन् जुनी जौवन धाय् गु छक जक वई’।
किजा पुजावलय् कःवम्हा यमदूत पूं भारा
वानिगु इलय्या कः वैम्हा माहां (सिपाही)
या प्रतीक जक खःला? गनां तताया विरह
इब्सनया कतामारीया छें (Doll's House)
या नोराया प्रतीक जक खःला? दुवालः
स्वय फः सा अजनं बांला। छाय् धः सा
व नपां ज्वलागू बुथु (तःसिं) व म्हवयया
घटनात नं समाजय् अपलं मरुगु मखु।
‘गुलाँ लठि कपायें फेडा कतु स्वतु मजः’
म्यें या ‘साजन भाजु’ वहे स्त्रीलम्पटया
प्रतिक गनां यमदूतया उपस्थिति जक खःला
? छिं नं थःगु विचः तय् फै। अथवा
उब्लेया धापु काथं ‘कालं त्वतः वाना अलय
काय दःम्हा साहुं त्वतः मवां’ धाय् गु खँ त्वा
खँ भाय् नं थुकिता पुष्टियाय् ता ग्वाहाली
याइला? मखुसा यमदूतया कल्पना छगु
अन्धविश्वासता विश्वासं कय् च्याडः खः
धायो च्वनय् गुया मेगु विकल्प मरु।

मोहनी वै मालश्री न्यंकी। गरिवया
अवस्था चित्रण याडः क्यनि।

नययाता नसामरु, तिययाता तिसा मरु
च्वनय्याता बास जिनं मरु रे दैव॥

तः हांगु नाखाया इलय जलाखाला
थ-थिति नपां ज्वरय् जुयो पिबवय् मफूसा
छवइगु नुगः लोक म्ये खं न्यंक च्वनी।
धात्थेंगु छपा समाजया खवः पा जुयो। अलय्
अमूर्त सम्पदा काथं बुलुहुं नुगलयया धाँ-
घिमाय् थाकः लोक बाजा थाडः देक्य् वानि।
खवःगु नुगः छखय् तयो बाँसुरी पुयोज्वी।
अलय अखय्ला थखय्ला मरुगु जीवनता म्व
म्वं पला खवायें थातय् लाकः प्याखं पा काई
छगु धात्थेंगु लोकजीवन कः घाडः।

लोक म्ये दुनय मेगु विदेशी वस्तुया
नां वै मखु। भीगु थासय् दःगु, भीगु थःगु
मौलिक पहः मौलिक बस्तुया नां म्ये खं
धायो च्वनि। चाहे व हाकू परासी तुइगु
गाचा थजु वा तिसा वस, कली, तुकी, मुकी,
सिन्हपता, हे थजुयो ब्यू। गर्थेकि-
वछु गल्ली थवछु गल्ली मखं त्वः या गल्ली रे
पानवती मैयाँ न्ह्याडः वगु जडगीसिंहिया कल्ली रे।

जरिवह्या सिंखः तयो दय्कः तःगु
भीगु मौलिक तिसा अः बुलुहुं ताडः वान।
अलय् इहि व बाराया इलय् डयो जूसां उगु
कल्ली न्ह्याकिगु चलन धःसा कः घाडः
च्वना हे तिनि।

- तहीथक्या तायो दु चिह्नी थकुया पायो दु:
राजमतीया बिजं कनी दु:

थाना छ्यलः तःगु बिजंकनी
(गनांकली) छु धाय् गु सिइकेता जर्मनया
पुस्तकालय व म्यूजिमय स्वः वांगु खाँ वाद्मय
पुरुष सत्यमोहन जोशी काडः दयूगु अः नं
लुमांसे व। अथेहे

द्योयाता सिन्ह स्वं मयजुयाता ह्योंगु स्वं
भाजुयाता गुणकेरा स्वं।

अलय् ब्योह्या लगनय् भाजु
म्हासिइकिगु वहे गुणकेरा स्वं खं खः।
अलय्

द्योयाता सियाबजी मयजुयाता ल्हया बजी
भाजुयाता तिकीं बजी न्हं।

अः तिनिगः या तिकीं बजी थ्य
मथ्यां नां जक ल्यं दः नि थें जुय धुंकल।
भीगु थःगु मौलिक बजी, अलय् ल्याम्हो
दाजुं धौ ग्वः है। ल्यासे ततां वलाबजी है,
लामी मयजुं ग्व ग्वयें ज्वडः है।

धात्थे भीगु धौ, बजी भीगु
मौलिकता लोकम्येख्य चिन्यगु त्वः फिइकगु
मरु। उकीं हे धाय फः लोक साहित्यं
भीगु थःगु पहः चह हिसि दः गु ख्वःपा
खः। थवयां छफूति नेफूति नाः गुलिचा थें
जक जुल। लोकसाहित्यक द्या गुलि तः
द्या व थागा काय थाकु। ख्वप नगरपालिकां
लोक म्यें वा लोकलयया लिधंसाय प्रगतिशील
भजनया धिंधिं बल्ला ग्वसः ग्वःगु बुखाँ
प्याहाँ वयवं मिखातिसिडः ख्यूं जक हः
जुइपुं छम्हानेम्हासिनं खाँ व्यक्वय्क प्रचार-
प्रसार याडः जूगु खानय् दः। म्हेगया ब्वाया
दुःख मस्यूम्हासिं थः ता नं म्हासिइ मखु।
म्हेगया इतिहास मध्वंसे थौ याता जक स्वयो
हः जुयगु साउनबलय् थवकम्हा चकुचां
भदौया खुसी बः स्वस्वं जिन्दगी थवथें तः
बःगु खुसी बः हे मखानी जक हः जुय थें
खः। भीखः, भीगु म्हासिइका भीसं
त्वः फिइकः यंकसा कन्हे भी छु दक
क्यनय् ? सु दक धाय्। भीगु बुबः
घासा, लाया ताजि, वसया बाना, थवं (मुति
थवं; कः थवं, भ्याते थवं, ह्यों थवं)
मुसगु अय्ला, मिखा कांगु अय्ला नपां
वाउँचा (तरकारी), सिसाबुसा नं अमूर्त
सम्पदा दुनय्या भजन म्यें दुनय छ्यलः
तःगु खानय् दः। वहे भीगु पहः उलेज्या
याय् गु मतिं हे लोक लय ख्यूं प्रगतिशील
खाँवः तयो भजनया नामं ख्वप नगरपालिकां
धिंधिं बल्ला याडः च्वंगु च्वछाय् बहगु पला
खः। थव थिं धिं बल्ला जुय धुंक: अपसिया
खवःचकानिगु विश्वास याय् छिं।

ख्वप नगरपालिकाया ज्या भूवः त

फुक्क मिसातय्ता काथं छिनिगु भिंजुइगु लकस जिमिसं दय्के

फागुन 30 जते



ख्वप नगरपालिकाया गवसालय १९३ कगू अन्तर्राष्ट्रिय श्रमिक महिला दिवसया लसताय 'समाजवादी आन्दोलन हछ्याय्ता मिसा मस्त छप्पा जुयमः' धाय्यू छागू ज्या इवः मंगलवार नगरपालिकाया नगरसभाकक्षसं जुल ।

ज्या: इवः सं ख्वप नगरपालिकाया प्रमुख सुनिल प्रजापति जु मिसा मस्तय्ता (आरक्षण) पाखुपो तय्गु स्वयो अमितानं फुक्क थासय् योग्य याडः हछ्याय्मः धायोदिल । धात्थेख्यक मिसा मस्तनं उथिंयंग हछ्याय्गु खःसा शिक्षा व लाहातय् ज्या दय्कः वियगुली हदाय् च्वडु ज्यायाय्मः गुगु ज्या याय्गु कुतः जिमिसं दय्क यंक्य धायो दिल । वयकलं समाजवादी व्यवस्थाय् योग्यता काथंया ज्या व ज्या काथंया ज्याला दैगु, शिक्षा, स्वास्थ्य धेबा पुलय् म्वायकः निःशुल्क नपां लाहातय् ज्या दैगु पक्का जुइगुलि सुननं हे जितायां पाकल धाय्गु मनय् तय मालि मखु धायोदिल ।

ख्वप नगरपालिकां शिक्षा क्षेत्रे यागु लगानिया लिच्चवः थौं या ह्यूपा खः धायो दिसे गुकिं याड मेपुं स्वयो ख्वपया मिसामस्त हज्यागु खाँ व्याकसे वयकलं समाजय् ह्यूपा ह्यता मिसामस्तय्गु तः ह्यांगु लाहा दैगु खाँ व्याकसे पूँजीवादी चूनावं छम्हा नेम्हा मिसामस्तय्तु तः जक भिं जुइगु खाँ व्याकः दिल ।

अथेहे उप प्रमुख रजनी जोशी जु मिसा मस्तय्ता पाखुयो

जक तय्गु मखुसे शिक्षा व व्यक्तित्व विकासय् उथिं ग्रंथः तय्मःगु खाँ व्याकसे मिसा मस्तय्तं च्वय थ्यंक ब्वनय्गु नपां छागू विषय विज्ञ ज्यूगु काथं ब्वनय् मः धायो दिल । २१ औं शादिंता योग्य पुं मिसा मस्त जुयता अमिसं ब्वनय हे मः वयकलं बः बियो दिल ।

नेपाल क्रान्तिकारी महिला संघ केन्द्रीय समितिया नकीं मप्जु अनुराधा थापा मगरं अन्तर्राष्ट्रिय श्रमिक महिला दिवस डायेकेगुया मू तातुना भीगु देशय नं समाजवादी आन्दोलन हछ्याता खः धायो दिसे पूँजीपति पार्टीया महिला संगठनयाय् पिसं नारी दिवसया नामय म्वः मरुगु खाँ ह्यूपुडः महिला संघर्षसं लज्या चाय्पुइगु ज्या याडः वगु खाँ कुंखिडः दिसे ज्या साडः, नैपुं ज्यापु ज्यामिया मिसा मस्तय्गु जीवनय् धात्थेंगु ह्यूपा ह्यता समाजवादी व्यवस्था महःसे मगा धायोदिल ।

उगु ज्या इवः सं वडाया दुजःपुं बिष्णु केशरी दुवालं चिनियाँ कम्पुनिष्ट पार्टीया न्हपांम्हा महिला 'शियाड चिडः यू' या जीवनी व सुमित्रा बोहजुं महिला योद्धा 'ह्यारिट टबम्यान' या बःचा हाकलं जीवनी काडः दिल ।

अथेहे कार्यपालिकाया दुजः रोशन मैयाँ सुवालया सभानकिल्य जूगु उगु ज्या इवसं मेम्हा कार्यपालिकाया दुजः छोरी मैयाँ सुजखुं नं थःगु नुगः खाँ तयो द्यूगू खः ।

सञ्चार अभियान

फागुन 30 जते



‘श्रमको सम्मान, राष्ट्रको अभियान’ नारा ज्वड़: ‘न्युनतम रोजगार नागरिकको अधिकार सम्बन्धीया सञ्चार अभियानया ज्या इवः ख्वप नगरपालिकाया उपप्रमुख रजनी जोशीया मू पाहाँल्य ख्वप नगरपालिकाया वडा नं. १ या कार्यालयया रवसालय जुल ।

उगु ज्या इवः सं उप प्रमुख जोशी जुं सार्वजनिक विकास निर्माणया ज्यात ज्या मरु पिन्ता ज्या दय्कः बियगु तातुड़ः नेपः या सरकारं ज्या मरुपुं मनूत म्हासिइकः अमिगु धलः दय्क छाँ आर्थिक

योजनाया प्रतिवेदन लः ल्हाडः दिल

फागुन 30 जते

ख्वप नगरपालिकाया रणनीतिक योजना नपांया प्रतिवेदन प्रमुख प्रजापति जु याता लः ल्हाडः दिल ।

नेपाल सरकार खानेपानी मन्त्रालयया सहसचिव तिरेश प्रसाद खत्री, शहरी विकास मन्त्रालयया सहसचिव रामचन्द्र दंगाल, कानून न्याय व संसदीय मन्त्रालयया सहसचिव निर्मला अधिकारी भट्टराई व संघीय संसद सचिवालयया सहसचिव सुरेन्द्र अर्यालया मंकः पुचलं दयकगु ख्वप नगरपालिकाया रणनीतिक योजना (२०७९-८०) नपांया प्रतिवेदन मंगलबार छाँ ज्या इवः याडः प्रमुख प्रजापति जु याता लः ल्हाडः दिल ।

उगु ज्या इवः सं नगर प्रमुख प्रजापति जुं ख्वप नगरपालिकाया विस्तृत अध्ययन याडः दयकगु रणनीतिक योजना धार्थें हे दस्तावेजकाथं जुइगु खाँ व्याकसे ख्वप नगरपालिकाता थःगु कार्य क्षेत्र (ज्याया लागा) दयकः ज्यासांगु पुचःता सुभाय देछायो दिल ।

ख्वप नगरपालिकां शिक्षा, स्वास्थ्य, सम्पदा पुनः निर्माण थजगु थी थी लागाय् याडः वयों चवंगु ज्याया बारे मे मेगु स्थानीय

वर्ष्य म्हवचाखय् सचिन्हन्ह्या ज्या बियगु मति काथं प्रधानमन्त्री स्वरोजगार ज्या इवः ता हछ्यागु खः धायो दिल । वयकलं मिसामस्तय्ता शिक्षा बिय फःसा ज्या मरु धायो च्वनय् माली मरु धायो दिसे समाजवादी व्यवस्थाय् मिसा तय्गु अधिकार नं सुनिश्चित जुइ धायोदिल ।

मिसा मस्त व मिजं मस्त छाँ रथया नेपांगा खः धायो दिसे नपां नपां यंकय् मः धायोदिसे वयकलं ख्वपया शिक्षा, स्वास्थ्य, सुचुकुचु, सम्पदा ल्यंकः म्वाकः तय्गु ज्यायाता ‘ख्वप मोडेल’ काथं म्हासिइका पिढवयो वयो चवंगु खाँ नं कूल दिल ।

ख्वप नगरपालिका वडा नं १ या वडाध्यक्ष श्याम कृष्ण खत्री जु विदेशं सामान न्याडः जक दे गुब्लै हमज्याइगु, तःमलाइगु खाँ व्याकसे वयकलं भीगुदेशय् सर्यकिगु नसाञ्चलं, तरकारी, सिसाफल थीथी बस्तुया बालागु बजारीकरण जूसा जक थानाया किसानतय्गु मेहनत सितिं वानिमखु धायोदिसे बजार भः अपलं थिकय् जुयो जनतां दुःख स्यू स्यूं वगु खाँ व्याकसे महद्गीया विरुद्धय् चैत्र २ गते जुइगु जुलुसय् ब्वति कायो दियता नं इनाप याडः दिल ।

ज्या इवः सं वडाया दुजः पुं सूर्यप्रसाद श्रेष्ठ, प्रधानमन्त्री प्रमुख रोजगार ज्या इवः या लक्ष्मी प्रजापति, समाज सेवी कृष्ण बहादुर दुगुजुं नं न्वचु तयो दिल ।

तहं नं डालकाय् फःसा मथां हे दे हज्याइगु खाँ व्याकसे ख्वप नगरपालिकाया डादाया रणनीतिक योजनाया व्याक अध्ययन हज्याय्गु कुतः याय्गु बचं बियो दिल ।

अथेहे संघीय संसद सचिवालयया सहसचिव सुरेन्द्र अर्यालं रणनीतिक योजना दय्के मःगु खाँ स्पष्टयासे नगरपालिकापाखं पिथांगु पिथानात व्याक ब्वडः दय्कगु ख्वप नगरपालिकाया रणनीतिक योजना दस्तावेज काथं जुइगु नपां योजना छ्यलय्ता काथंछिकय्ता बः याडः दिल ।

नेपाल प्रशासनिक प्रशिक्षण प्रतिष्ठानया वसन्तराज सिगदेल जु रणनीतिक योजना दय्केगु इवलय ख्वप नगरपालिकाया खायें अध्ययनं अपलं विषयया खाँ सिइकागु खाँ काडः दिसे सार्वजनिक लागाय् विकास हछ्याय्ता थुगु अध्ययनं तहांगु रवाहाली याइगु विश्वास प्वकः दिल ।

उगु ज्या इवः सं ख्वप नगरपालिकाया उप प्रमुख रजनी जोशी, वडा नं१या वडाध्यक्ष रबिन्द्र ज्याख, प्रशासकीय अधिकृत दामोदर सुवाल नेपाल प्रशासनिक प्रशिक्षण प्रतिष्ठानया अनुप भूतेल,

सचिवत खुग्गु ख्वप पौ. बःछि पौ(पाक्षिक)

सुन्दर श्रेष्ठ पुं भायो द्यूगु खः ।

ख्वप नगरपालिकाया रणनीतिक योजनासं नगरपालिकाया संगठनात्मक पह (स्वरूप) थी थी रणनीतिक लागाय् नगरपालिकाया पाखं स्वदा हाँ व डादा हाँया शिक्षा, स्वास्थ्य, सम्पदा व कला संस्कृति ल्यंकः म्वाकः तयगु ज्या व विकास निर्माण, सुचुकुचु, त्वनयगु ना:, सहकारी विकास निजी आवास व लहवन्य् कानय् सीप मूलक तालिम थजगुलि ज्गु ज्याया ख्वप नगरपालिकाया बल्लागु व बमलागु (सबल व कमजोर) पक्ष, अवसर नपां पंगः या विषय व्यापक खाँ च्वयो तःगु दः ।



विषादी म्हवँजक छ्यय्केता अन्तरक्रिया

चैत्र १ गते

ख्वप नगरपालिकाया प्रमुख सुनिल प्रजापतिया नायोसुई पोषण प्रवर्द्धन व विषादी न्यूनीकरणया लागिं स्वास्थ्य, शिक्षा, कृषि व भेटेरिनरी कृषि सहकारी, कृषक पुचः, विषादी व्यवसायीत नपां मेपुं स्वापू दःपुं पुच नपां च्वडः छगु अन्तरक्रिया ज्या इवः जुल ।

स्वास्थ्य कार्यालय ख्वपया र्वसालय जुगु ज्या इवः सं नगर प्रमुख प्रजापति किसान तयसं वास काथं थमनं अपलं सय्केगु मतिं बालीनालीखय् विषादीत छ्यलः वसेलिं जनस्वास्थ्य बाँमलागु लिच्चवः लाडः च्वंगु नपां मपुनिगु ल्वय भन भन अप्वः सिक्य् दयो वगुलिं नेपः या सरकारं थुकिता पानय्ता हदाय तयो ज्या सानय् मः धायो दिल ।



वयकलं पूजीवादी व्यवस्थाय् लबः या लागिं न्ह्यागु याय्तानं लिफः मस्वैगु व्यापारीत दैगुली अजगु विषादित छ्यलि बलय वैगु बाँमलागु लिच्चवया खाँ सर्वसाधारण जनताता कानय् फःसा छु भति

म्हवः जुइला घायोदिसे छुं नं वस्तुया पलिसा मव्यंकः अजगु ज्या म्हवचा जुयो मवानिगु खाँ कुल दिसे ख्वप नगरपालिकां धवगिङ्गु फोहार मुडः कम्पोष्ट (नेपाली) सः दयकः किसान तयता दांकः मियो वयो च्वंगु खाँन ब्याकः दिल ।

स्वास्थ्य कार्यालय भक्तपुरया कार्यालय प्रमुख कृष्ण बहादुर मिजार जुं विषादी छ्यलिपुं व मिइपिन्ता धवाथुइकः कानय् फःसा बांलाइगुलि थजगु ज्या इवः तयागु खाँ काडः दिल ।

अथेहे प्रधानमन्त्री कृषि आधुनिकीकरणया कार्यालय प्रमुख चुडामणि भट्टराई विषादी छ्यलयगु म्हवँ याडः यंक्यगु प्रस्तुतीकरण यासे नेपः या बुँ याय् ज्यूगु बुँ प्रति हेक्टर ३९७ ग्राम विषादी छ्यलः वयो च्वंगु थ्व दकलय अपः तरकारीखय् छ्यलः वयो च्वंगु खाँ कुल

दिसे मनूया शरीरय् विषादीत नयो, सास ल्हाडु त्वनयगु ना: खं द्वहैं वानिगुलिं विषादीया छ्यलाया ज्ञान बांलाक मरुगुलिं कृषकपिसं थः यत्थे छ्यलः च्वंगु अर्गानिक खेतीता नं पंगः दाँ वयो च्वंगु, लब त्यता व्यापारी तयसं ज्यूगु मज्जूगु विषादीत छ्यय्किगु नपां उपभोक्ताया स्वास्थ्यता स्वयो लबःता हदाय तयो अपलं छ्यलः च्वंगु खाँ त

पिब्बयो दिल ।

ज्या इवः खय् भः पुं कृषक, विषादीया बञ्जत, कृषि व भेटेरिनरीया प्राविधिक पिसं बालीखय् हवलिगु विषादीया छ्यलाया ज्ञान बांलाक मरुगुलिं कृषकपिसं थः यत्थे छ्यलः च्वंगु अर्गानिक खेतीता नं पंगः दाँ वयो च्वंगु, लब त्यता व्यापारी तयसं ज्यूगु मज्जूगु विषादीत छ्यय्किगु नपां उपभोक्ताया स्वास्थ्यता स्वयो लबःता हदाय तयो अपलं छ्यलः च्वंगु खाँ त

उगु ज्या इवः सं स्वास्थ्य कार्यालय भक्तपुर रोग नियन्त्रक शाखाया दीपक अछामिं नं न्वयु तयो द्यूगु खः ।

नायो भाजु बिजुकछुँ नेपाली सः दयकगु स्वः भाल

चैत्र ३ गते

नेपाल मजदुर किसान पार्टीया नायोभाजु नारायणमान बिजुकछुँ (रोहित) जु ख्वप नगरपालिका वडा नं द लर्केच्चवंगु ख्वप नगरपालिकाया कम्पोष्ट(नेपाली) सः दय्किथाय भायो स्वयो दिल ।



आना स्वयं धुंक, नायो भाजु बिजुकछुँ जु ख्वप नगरपालिकाया सिएम विएम प्रविधि छ्यल: ध्वगिइगु फोहरत मुडः ना मवइगु कार्थ बालागु सः दय्किगु प्रविधि नेप: दे थजगु विकासोन्मुख देशता बाला धायो दिसे देसी सः या पलि नेपाली सः छ्यल अन्नसय् के फःसा कृषकपित्ता भिं जुइगु खाँ काडः दिल । आना ज्या सानिपुं ज्यामि व कर्मचारी पिनिगु स्वास्थ्यता बालागु बिचः याय् मःगु तपां न्हूँ न्हूँ न्हूँ

निरीक्षण



चैत्र ३ गते

ख्वप नगरपालिका वडा नं. द लिबाली करिडोर दय्केगु ज्या इवः स्वभायो दिसे ख्वप नगर प्रमुख सुनिल प्रजापति ।

प्रविधित छ्यल: अज बालागु सः दय्केता ई काथंया तालिमत बियमः गु खाँ नं वयकलं धायो दिल ।

नेपालय् देसीसःता बियो वगु अनुदान म्हवचा यागु, सः हे न्यायूगु मरुगु व भः यक्क थिकय यागु खाँ स्वाडः दिसे वयकलं नेपालय हे सरकारं देसी सः कारखाना तय्मः धायो दिल ।

वयकलं विकसित देशय् नं पिकाइगु कम्पोष्ट सः दय्किगु प्रविधित स्वयो सय्केमः गु खाँ ब्याकसे इलय हे सः बिय फःसा अपलं अन्न सय्के फैगु खाँ नं ब्याक दिल ।

नगर प्रमुख सुनिल प्रजापति ख्वप नगरपालिकां ध्वगिइगु फोहर मुड सिएन बिएम विधिछ्यल: नेपाली सः दय्केगु ज्या न्ह्याकगु खाँ ब्याकसे ख्वप नगरं प्याहाँ वैगु फोहरत मुडः दय्केगु सः थी थी सहकारीपाखं कृषक पित्ता दांकः इड बियो वयो च्वंगु खाँ ब्याक दिल ।

ख्वप दे अपलं कृषक पुँ दःगु थाय् जूगुलिं नगरपालिकां सः दय्कः दांकः ब्यूगुलिं कृषक पित्ता ग्वाहाली जुइगु खाँ नं वयकलं काडः दिल ।

ज्या इवः सं ख्वप नगरपालिकाया उप-प्रमुख रजनी जोशी ख्वप नगरपालिका वातावरण समितिया पदाधिकारी रबिन्द्र ज्याख्वः, योगेन्द्रमान बिजुकछुँ, कृष्ण प्रसाद कोजु, कृष्ण प्यारी भुजु, मञ्जु मैर्याँ लाखाजु, ख्वप नगरपालिकाया प्रमुख प्रशासकीय अधिकृत कृष्ण गिरी, सः दय्किथाय्या कर्मचारी पुँ नं भःगु खः ।

अध्ययन भ्रमण्



श्रद्धा इन्ष्टिच्यूट अफ हेल्थ साइन्सया नर्सिङ न्हापांगु दाँ सं ब्वडः च्वंपु ब्बनामिपु ख्वप नगरपालिकाया फोहर थासय्लाकिगु ज्या स्वः वय्गु इवलय ।

स्वास्थ्य शिविर व छि क्वान प्रशिक्षण

चैत्र ४ जाते

ख्वप नगरपालिका वडा नं ५ या ग्रामसालय मचाँ, दुरुप्पया क्यान्सर सम्बन्धी शिविरया उलेज्या याड दिसे ख्वप नगरपालिकाया प्रमुख सुनिल प्रजापति जुं ख्वप नगरपालिकां नगरबासीपिनिगु शिक्षा स्वास्थ्यता न्हयाब्ले हदायतयो ज्या साड वयो च्वांगु, परिवार जनया उसायै बांलासा जक समुदाय अलय् देश हे हज्याइगु खाँ काडः दिल ।

स्वास्थ्यता दुरु न्हयाय्द मैं चा याइपिसं गुब्ले गुब्ले ख्याडः ठगय् नपां याइगुलिं नगरपालिकां थजगु शिविर तयमःगु गुकिं छु न ल्वय इलय हे सिइकः वास याय्ता शिविर त तं वयागु खाँ वयकलं काडः दिल ।

अथेहे स्थानीय पूर्ण गोपाल राजचलं नगरपालिकाया जनप्रतिनिधि पिसं शिक्षा, स्वास्थ्य, सम्पदाथजगु ज्याखय् बांलाक ज्या याडः वयो च्वांगु खाँ काडः दिलसा डा. आनन्द बाबु ढकालं क्यान्सर ल्वय इलय हे सिइकेफःसा लांकय् फै धायो दिल ।

ख्वप नगरपालिका वडा नं. ५ या वडाध्यक्ष नपां सभाया नायो योगेन्द्र मान बिजुक्छै जुं समाजवादी देशय् सरकारं जनताया



स्वास्थ्यता हदाय तैगु खाँ काडः दिल ।

ज्या इवः खय् लसकुस न्वचु जनप्रतिनिधि रीता फसिकवं, मेम्हा जनप्रतिनिधि सरिना द्योलां ज्या इवः छाय् याय् माला धायगु खाँ काडः द्यूगु ज्या इवः सं १८८ म्हा मिसा तय्गु स्वास्थ्य परीक्षण यागु खः ।

स्वः भाल

चैत्र ५ जाते

ख्वप नगरपालिकाया प्रमुख सुनिल प्रजापति जुं ख्वप या निजी व सामुदायिक ब्वनय कुथि स्वः भायो दिल । उगु इवलय् सार्वजनिक ब्वनयकुथित ख्वप नगरपालिका वडा नं १ सृजना नगरया सन्तति आ.वि., वडा नं ७ या वालसेवक आ.वि., नवीन आ. वि. व निजी स्कूल पाखय् १ वडा सल्लाघारीया अक्सफोर्ड एक्सिटिकल स्कूल, व सृजना नगरया सूर्य विनायक इड्गलिस



स्कूलत स्वयो दिला।

उगु इवलय प्रमुख प्रजापति जुं ब्वनय कुथिया प्र.अ. व शिक्षकपुं नपालाड ब्वनयकुथिया वस्तुगत स्थिति न्यडः शैक्षिक गुणस्तर च्वजाय्केता मार्ग निर्देश याडः दिल ।

वयकलं शिक्षक पिनिगु हाजिरी रेकर्ड, ब्वनामिपिनिगु ल्या, इलय् हे थ्यंक व, मव, ब्वनयकुथिया भौतिक अवस्था, कक्षा क्वथा व्यवस्थापन सुचुकुचु, साफ्कूथि, शौचालयया जानकारी कायो दिल । वयकलं न्हपाया कमजोरीत हाचां गायो, सुधार याडः ब्वनयकुथित हज्याय्ता निर्देशन बियो दिल ।

उगु इवलय प्र.अ.-पिसं नगरपालिकां याडः च्वांगु ग्वाहालीता सुभाय देलासे, कक्षा क्वथा, म्हेतय्गु ख्यः भौतिक संरचना मगागुलिं नगरपालिकां न्हपा लिपायाय् थे ग्वाहाली याइगु आशा प्वंकः दिल ।

ख्वप नगर दुनयया ब्वनयकुथि ७७ गूं तु जिल्लाया ब्वनामिपुं ब्वड च्वांगु ल्याखं क्यांगु दः । उगु इवलय् वडा नं. १ या वडाध्यक्ष श्याम कृष्ण खत्री, ५ वडाया वडाध्यक्ष योगेन्द्र मान बिजुक्छै, नगर शिक्षा शाखा भक्तपुरया कृष्ण प्रसाद कर्मचार्य नं भःगु खः ।

सचिव खुगूगु ख्वप पौ. बःछि पौ(पाक्षिक) ख्वप नगरपालिकाता गवाहाली याय्ता वर्लिन विश्वविद्यालयया प्राध्यापकपुं तयार

चैत्र ६ ज्ञते



ख्वप नगरपालिकाया प्रमुख सुनिल प्रजापति नपां जर्मनं भःपुं प्लास्टिक सर्जरीया सर्जन डा. जर्गन हुजमान व डा. रुडिङर लोहमानं सोमबार नपालाडः दिल ।

नपालाय्गु इवलय प्रमुख प्रजापति जुं जर्मन सरकारं ख्वपया कला, संस्कृति ल्यंकः म्वाकःतय्गु व सूचुकुचुख्य् याड द्यूगु ज्या याता ख्वपया जनता पाखं जर्मनी सरकारता सुभाय देष्यायो दिसे नेपःमिपुं व जर्मनी जनताया दथ्वी स्वापु अजनं क्वातुयो वानिगु

नगरप्रमुख त्वनय्गु नाःया मुहान स्वःभाल

चैत्र ६ ज्ञते

ख्वप नगरपालिकाया प्रमुख सुनिल प्रजापति जुं बाँसधारीया त्वनय्गु नाः या ट्यांकी व महादेव खुसी मुहान पुखुया सोमबार आना हे भायो स्वयो दिल ।

ख्वप नगरपालिका वडा नं २ या वडाध्यक्ष हरि प्रसाद बासुकला व केयूके यल भक्तपुरया प्रमुख चेत बहादुर ऐर नपांया पुचः चाँगुनारायण नगरपालिकाय् लागू महादेव खुसी मुहान पुखुया मुहान स्वःभाल ।

प्रमुख प्रजापति जुं सुख्खा इलय त्वनय्गु नाः या समस्या वसेलिं उगु समस्या ज्यंकय्ता काठमाडौं उपत्यका खानेपानी लिमिटेड (केयुकेएल) या प्रतिनिधि नपां बैठक च्वडः गथे याडः ज्यंक्य् फै धाय्गु छलफलया इवलय उगु थासय् स्वः भःगु खः ।

त्वनय्गु नाः या मुहान हे सुडः वांगु इलय नगरबासी पिन्ता त्वनय्गु नाः या समस्या ज्यंकय् थाकुगु खाँ प्रमुख प्रजापति जुं काडः दिसे जनताता अःपुक त्वनय्गु नाः इडः बियता नगरपालिकां थाय् थासय् ट्याड्की द्यक, नाः बोरिड याडः, नाः इडः वियो

विश्वास प्वंक दिल ।

वयकलं ख्वप नगरपालिकां छैं छैं नर्सिंड, वडा-वडाय् स्वास्थ्य केन्द्र चाय्कः, १०० गू शेय्याया ख्वप अस्पताल चाय्क, दांकः भिंकः व बांलाक स्वास्थ्य उपचार सेवा ब्यू ब्यूं वयोच्यंगु खाँ ब्याकः दिल । वयकलं ख्वप नगरपालिकां थःगु हे तुतिख्य् दानय्गु कुतः याडः वयो च्वंगु खाँ व्याकसे अस्पतालं अज बांलाक स्वास्थ्य सेवा बियता मेपुं थी थी पक्ष नपां खाँ ल्हाडः हज्याडः च्वंगु खाँ नं ब्याकः दिल ।

डा.हुजमान ख्वप नगरपालिकां यागु लसकुसं लय्तायागु खाँ काडः दिसे थानाया चिकित्सकपुं नपां प्लास्टिक सर्जरी, नुगः या ल्वय अपरेशन थजगु विषयसं बर्लिन विश्व विद्यालयया प्राध्यापक पिनी पाखं गवाहाली याय्गु इच्छा दःगु खाँ काडः दिल ।

वयकपिसं ख्वप अस्पतालय भायो स्वयो हक्कनं नगरपालिका नपां छलफल याय्गु खाँ व्याकः दिल ।

नपालाय्गु इवलय ख्वप नगरपालिकाया उप-प्रमुख रजनी जोशी, प्रशासकिय अधिकृत दामोदर सुवाल, ख्वप अस्पतालया डा. मजेश प्रताप मल्ल, डा. अमर प्रजापति, अस्पताल व्यवस्थापक विश्वजित प्रजापति पुं नं भःगु जुल ।



च्वडागु खाँ काडः दिल । ख्वप नगरपालिकाय् त्वनय्गु नाः या समस्या ज्यंकय्ता हदाय् तयो जनप्रतिनिधिपुं जुयो च्वंगु खाँ नं वयकलं ब्याक दिल ।

प्रमुख प्रजापति जुयाता महादेव खुसीया लिपांया अवस्थाया खाँ काडः दिसे केयू केएल प्रमुख ऐरजुं नाः छैं हे सुडः वाडः च्वंगुलि ख्वपय् त्वनय्गु नाः या समस्या जु जुं वगु खः धायो दिल ।

सचिवत खुगूगु ख्वप पौ. बःछि पौ(पाद्धिक)

वडा नं. १ या स्वास्थ्य शिविर

चैत्र ७ गते



ख्वप नगरपालिका वडा नं १ या ग्रामसालय मंगलवार वडा कार्यालयया हःनय् चिनी ल्वय, प्रेसर दुरूप्व व मचाछ्या क्यान्सर परीक्षणया स्वास्थ्य शिविर जुल। उगु शिविरय् २३७ म्हा वडाबासी पिसं परीक्षण याकगुलि १९७ म्हासिन दुरूप्व व मचाछ्या या क्यान्सरया जाँच याकगु खाँ वडाध्यक्ष श्याम कृष्ण खत्रीं काडु दिल।

चैत्र ९ गते

सर्वसुलभ उपभोक्ता सहकारी संस्था लि. या शाखा लिबाली नं चाय्कल। ख्वप नगरपालिकाया प्रमुख सुनिल प्रजापति जुं शाखाया पसः उलेज्या याडः दिसे वयकलं सहकारी संस्थां व्यापारी तय्सं थें लबः जक नयगु मस्वसे थःपू दुज, पिन्ता सुविधा वियागु नपां नेपःया उत्पादनता च्वालायो पसः चाय्केमःगु खाँ व्याकसे फौबञ्ज (विचौलिया) त पाखं बचय् जुयो हज्यायता सहकारी पसःया तहांगु लाहा दैगु खाँ व्याकसे पसलय् सर्वसुलभ व भिंगु, बांलागु सामान बियमः धायोदिल।

जन समुदायया विश्वास त्याकः, उपभोक्ता पिन्ता थःगु अधिकार प्रति सचेत याडः कानुन ब्यू उपभोक्ता अधिकार छ्यप्केता सक्षम याय् फय्केगु नं याय्मः वयकलं धायो दिल।

ख्वप नगरपालिका वडा नं ८ या वडाध्यक्ष कृष्ण प्रसाद कोजुं सर्वसुलभ सहकारी उपभोक्ता पिन्ता भिंज्याखय् छ्यलः हज्याय् फःसा तः लाइगु खाँ व्याकसे लिबाली लागाय् जुयो च्वांगु विकासया खाँ कुलदिल।

ज्या इवः सं संस्थाया नायो लक्ष्मी प्रसाद लाखा, न्वकु बद्री लाखा, दांभारी नारायणमान वनमाला, सल्लाहकार कृष्ण भक्त लवजु व संस्थापक नायो कृष्ण गोविन्द लाखाजु पिसं संस्था निःस्वानय्

उगु ज्या इवः सं ख्वप नगरपालिकाया प्रमुख सुनिल प्रजापति जुं आधुनिक नय त्वनयगु ज्याखं व ज्या मसासिंच्वनिगु जीवन शैली याडः मपुनिगु ल्वय क्यान्सर, सुगर, प्रेसरया ल्वय अप्ययो च्वांगु खाँ व्याकसे नगरपालिकां थजगु ल्वयया बारे ग्राक्यता हिंगतुं वडाय् शिविरत ततं वयो च्वांगु खाँ काडु दिल।

वयकलं शरीरया पिन्य् जुइगु घः खानयदैगुलिं मथां वास याइगु अलय शरीर दुनय् जुयो च्वनिगु ल्वय काचाक्क सिइके मफैगुलिं थजगु शिविर इलय व्यलय तयो वयागु गुकिं इलय है ल्वय जुगु सिइकः वास याय् फैगु खाँ व्याकसे दुरूप्वः व मचा छ्या क्यान्सर अपलं मिसामस्तयसं कष्ट नयो अकालं सीयनपां मालिगुलिं अमिता नगरपालिकां अभिमुखीकरण न याडः वयागु खाँ कुल दिल।

वडा नं १ या वडाध्यक्ष श्याम कृष्ण खत्री जुं ख्वप नगरपालिकां छूँ छूँ नसिडु सेवा ब्यू ब्यू वयो च्वांगु न्ह्यागु नं ज्याखय् वडाबासीपिसं ग्राहाली याडः च्वांगु खाँ व्याक दिल।

ज्या इवः सं वडा नं १ या वडाया दुजः पुं सूर्यप्रसाद क्षेष व गंगा लक्ष्मी बमनू नं न्वचु तयो द्यूगु खः।

सर्वसुलभ सहकारीया शाखा विस्तार

मःगुया तातुना काडु दिसे सहकारीया पसः सुथाय ७:०० ता इलय् निसे बहनी ८:०० ताइलय्तक चाइगु पसलं भीथाय् है ल्हगु ताइचिन बजी, तुचिकं, परम्परागत नेवः घरबुना कापः व पोशाक नं मिइगु खाँ न व्याक दिल।



इन्टरनेसनल साइन्टिफिक कमिटीया बैठक

चैत्र ७ जाते



संस्कृतिया नामय जुइगु विदेशी हस्तक्षेप पानय् मः धाय् गु विचः स्वनिगःया विश्व सम्पदा स्थल ल्यंकः म्वाकः तय् गु नपां व्यवस्थापन विषयया इन्टरनेसनल साइन्टिफिक कमिटीया बैठकया उलेज्या हनुमान ध्वाका यें या लोहें चोकय् जुगु ज्या इवः सं प्वंकः द्यूगु खः ।

पुरातत्व विभागया रवसालय जुगु उगु ज्या इवः सं ख्वप नगरपालिकाया प्रमुख सुनिल प्रजापति जुं ख्वप नगरपालिकां मूर्त सम्पदा नपां अमूर्त सम्पदानं ल्यंकः म्वाकः तय् गुलि उलिहे हज्याडः ज्या साडः वयो च्वंगु खाँ नपां दायें दायें पतिकं छगु नं छगु सांस्कृतिक विधाया धिधिं बल्ला, याडः, सांस्कृतिक गुरुपिन्ता हानय् ज्या व थी थी सांस्कृतिक पुचः पिन्ता आर्थिक अनुदान ब्यू ब्यू वयो च्वंगु खाँ काडः दिल । वयकलं महत्वपूर्ण सम्पदा ल्हवनय् कानय् ज्या ठेककापाखं याकसा भीगु थःगु पहः तांकय् फःगु ठेकेदारं सम्पदाया मूल्य मान्यता स्वयो लबःजक स्विङुलि ठेकेदारया नाफालिसे भीगु सम्पदाया महत्व हिलय फैमखु धायो दिल । उकीं छुनं सम्पदा ल्हवनय्- कानय् ज्या स्थानीय जनतापाखं याकय् गु कानूनी व्यवस्था द्यकेमःगु, अः छ्यलः तःगु आर्थिक ऐन नियमत सम्पदा ल्हवनय् कानय् ता पांगः जुयो च्वंगु दः धायो दिसे वयकलं पुरातात्विक लागाया अध्ययन अनुसन्धानता मदिक्क हज्याकः तय् मः धायो दिल ।

वयकलं सिन्धुघाँटी, हरपा व मोहन्जोदाडोया पुरातात्विक उत्खननं प्राचीनकालय् आना गजगु नगर दः गु, उब्लेया वास्तुकला व कलाया विकास, आर्थिक सामाजिक जीवन व धार्मिक अवस्था गजगु धाय् गु थुइकेता गवाहाली जूथे स्वनिगलय् लिच्छवीकालीन व मल्लकालीन सम्पदाया अध्ययन अनुसन्धानं न्हूं न्हूं तथ्यत लुइकेता गवाहाली जुइगुलि भीगु ध्यान उकीं लायमः धायो दिल ।

अः भीगु देशय विदेशी संस्कृतिया बांमलाक लिच्चवः लाडः च्वंगुलि चिन्ता प्वंकसे वयकलं भीगु थःगु पह मौलिकता ल्यंकः म्वाकः त तं संस्कृतिया नामय जुइगु बैदेशिक हस्तक्षेप पानय् भीता तस्कं थाकुयो च्वंगु दः धायो दिल । नपां सुधारया नामय यागु गुलिनं ज्याखं भीगु थःगु पह ता तप्यंक हे चुनौती ब्यूगु दः । मौलिकता भीगु थःगु म्हसिइका खः । गुम्हासि थःगु मौलिकता

तांकि वं थःगु फुक्क तांकी । उकीं मौलिक सम्पदा व संस्कृतिया महत्व गवाकिगु, उकिता थःगु धाय् गु निष्ठा ब्लांकिंगु व मौलिक संस्कृति व सभ्यताया खाँ ब्वनय् क्युथि व कलेजया कोसर्य दुथ्याकय् मः धायो दिल ।

ज्या इवः सं प्रतिनिधि सभाया दुजः विराज भक्त श्रेष्ठ छ्गू छगु सम्पदाया थः थः गुहे बाखं दैगुलिं मूर्त-अमूर्त सम्पदात ल्यंकः म्वाक तय् ता राज्यं विचः याय् मः धायो दिसे विकास व सम्पदा ल्यंकः म्वाकः तय् गु दथ्वी कातुमतु काडः च्वंगु खाँ ब्याकः दिल ।

प्रदेशसभाया दुजः शैलेन्द्र बज्ञाचार्य जुं स्वनिगलं न्हिया न्हिथं नेवः तः बासं दाडः वानय् माल च्वंगु दुःख प्वंकसे थुकिता पानय् मफूसा ५/१० दाया दुनय स्वनिगलय् नेवः संस्कृति मालय मालीतिनी धायो दिल ।

यें महानगरपालिकाया उपप्रमुख सुनिता डंगोलं सम्पदा लागाय् सम्पदा मैत्री पसः जक द्यमःगु, सम्पदा फुक्क विदेशी दय्कब्यूसा भीगु ज्या गना क्यनय् गु धायो दिसे आगांठे हे भीगु पहलं भीसं हे भीगु सीप साधन छ्यलय् मः धायो दिल ।

चाँगुनारायण नगरपालिकाया प्रमुख जीवन खत्रीं सम्पदा ल्यंकः म्वाकः तय् ता एकीकृत योजना दय्क हज्याय् मः धायो दिसे चाँगुनारायण व मेमेगु सम्पदात इलय हे दय्के मफूसा लिपाया पुस्तां भीता छु धाई धायो दिल ।

पुरातत्व विभागया महानिर्देशक दामोदर गौतमया सभानायेलय् जूगु उगु ज्या इवः सं संस्कृति मन्त्री सुदन किराँती भाइगु ज्या इवः दःगु धः सां संस्कृति सचिवं मू पाहाँया भाला कुबियो द्यूगु खः । ज्या इवः सं युनेस्कोया प्रतिनिधिपिसं बैठक तःलाय् मः धायो भितुना देछायो दिल ।

सचिवत खुगूगु ख्वप पौ. बःछि पौ(पाद्धिक)

ख्वप कलेजय् न्हूंपुं प्राचार्यपुं नियुक्त

चैत्र १० गते

ख्वप नगरपालिका पाखं चाय्कः तःगु ख्वप मा. वि, ख्वप कलेज, शारदा, क्याम्पस व ख्वप कलेज अफ ल ख्य् न्हूंपुं प्राचार्य पुं नियुक्त यागु जुल ।

ख्वप कलेज व शारदा क्याम्पसय् प्राचार्य प्रकाश कुमार श्रेष्ठ, ख्वप मा. वि. व शारदा क्याम्पस मा.वि सं लक्ष्मी प्रसाद कर्मचार्य व ख्वप कलेज अफ ल ख्य् अधिवक्ता अनिता जधारी प्राचार्य नियुक्त यागु जुल । थुगु लसताय् शुक्रवार न्हूंपुं प्राचार्य पिन्ता शुक्रवार ज्या इवः यासे न्हूंपुं प्राचार्य पिनिगु महसिइका नपां लसकुस ज्या इवः जुल ।

ज्या इवः या सभानायो नपां कलेज व्यवस्थापन समितिया नायो नपां ख्वप नगरपालिकाया प्रमुख सुनिल प्रजापति जुं सञ्चालक समितिपाखं व्यः छ्यूगु प्राचार्य नियुक्तिया खाँ काड दिसे वयकपिनिगु कार्यकाल तः लाय्मः धायोदिल ।

न्ह्यलुवा छम्हा व्यक्ति मखुसे संस्थाया नीतिकाथं न्ह्याइगु संयन्त्र खः धायो दिसे वयकलं ख्वप नगरपालिकापाखं चाय्क तःगु शैक्षिक संस्थां अपलं पंगःत हाचां गायो निजी विद्यालय व कलेजनपां धिंधिंबल्लायासे दाकः भिंक बालाक ढ्वंक वयो च्वंगु खाँ ब्याक दिल । २०५६ सालय् चायकगु ख्वप सर्कल दुनय्या कलेजत थौं देया नमूना कलेजकाथं हज्याडः वयो च्वंगु खाँ ब्याकसे वयकलं फःगु स्थानीय तहता विश्वविद्यालय चाय्के बियमः धायोदिल ।

ख्वप नगरपालिकां विदेशी, गवाहाली मकसे हे वांगु कार्यकालय् १२४ गू स्वयो अपः सम्पदा ल्हवनय् कानय् व दानय्गु ज्या क्वचाय्केगु खाँ ब्याकसे वयकलं कतकय् लाहाफ्यगु ज्याखं भी भन भन कतया तुतिख्य् दानय् माली धायो दिल ।

अथेहे कलेज सञ्चालक समितिया उपाध्यक्ष नपां उप प्रमुख रजनी जोशी जुं २१ गू सदिंया लागिं योग्य पुं नागरिक

ब्वलांकय्ता कलेज व विश्वविद्यालयं अध्ययन अनुसन्धानय् अपलं बःबिय मःगु खाँ कुलदिसे ख्वप मोडेलता अभ व्यवस्थित याय्ता हज्याडः ज्या याडः च्वडागु खाँ ब्याकः दिल ।

ख्वपया लाय्कुलि च्वंगु न्ह्यक इयो दरवार लुयो वगु प्रमाणया लिधंसाय मल्लकालीन पहलय हे द्यकेगु काथं नगरपालिका हज्याडः च्वंगु दः धायो दिल ।



ज्या इव सं न्हूंपुं प्राचार्यपुं प्रकाश कुमार श्रेष्ठ, लक्ष्मी प्रसाद कर्मचार्य व अनिता जधारी पिसं थः ता ब्यूगु जिम्मेवारी न्ह्यलुवापिनिगु सल्लाह, सञ्चालक समितिया मार्ग निर्देशन व कलेजय् ज्या साडः द्यूपुं शिक्षक व कर्मचारी पिनिगु साथ व गवाहालीं पुवांक सानय्गु बचं बियो दिल ।

ख्वप कलेजया पूर्व प्राचार्य नपां ख्वप कलेज एमबी एसया इन्चार्ज रूपक जोशी कलेज निस्वांगु इल्य आंशिक शिक्षक काथं नियुक्त जुयो एम विएस इन्चार्ज, उप प्राचार्य जुजुं १४ दा स्वयो अपः ई ख्वप कलेजया प्राचार्य जुयो ज्या साडागु खाँ लुमांक दिसे थ्वनं लिपा नं कलेजया समग्र विकासया लागिं मदिसे हज्याय्गु बचं बियो दिल । ज्या इवः सं वडा नं ९ या वडाध्यक्ष रविन्द्र ज्याख्वं नं न्वचु तयो द्यूगु खः ।

छुँ छुँ नर्सिङ्ड सेवा

ख्वप नगरपालिकां न्ह्याकः च्वंगु छुँ छुँ नर्सिङ्ड सेवा चैत्र द गते वुद्ववार वडा नं द भटाप्वालय नर्सिपिसं वडाबासीपिन्ता प्रेसर जाँच यागु जुल ।



सचिव खुगूगु ख्वप पौ. बःछि पौ(पाक्षिक)

अःपुक सिं कायमफूसा स्वनिगः या थःगु पह ताडः वानि

चैत्र १० गते

ख्वप नगरपालिकाया प्रमुख सुनिल प्रजापतिजुं डिभिजन वन कार्यालय भक्तपुरया रवसालय जुगु भक्तपुर वन पैदावार उद्योगब्यवसायी संघया मंकः ज्याख्य् जूगु वन पैदावारय् आधारित सीप विकास तालिम पाखं ९० न्हूया फिनिसिड एण्ड फिटिडया विषयसं उलेजया शुक्रवार याडः दिल । ज्या इवः सं वयकलं कन्हे बांलाम्हा गुरु जुयता थौं बांलाम्हा शिष्य जुयमः धायोदिसे तालिम कःपित्ता कन्हे बांलाम्हा स्यनामी जुयगु मतिं थौं बांलाक ज्या सय्के मः धायो दिल ।



ख्वप नगरपालिकां भीगु थःगु पहलं छैं दानिपित्ता अनुदान बियो वयो च्वंगु नपां पुलांगु ख्वप नगर दुन्यैँ छैं दानिपित्ता मोहडाय सिं मतसें मगागु काथं हज्याडः वयो च्वडागु खाँ व्याकसे वयकलं सम्पदा ल्हवनय-कानय् व दानयता सिं अःपुक कायथाय् मरुगुलिं स्वनिगः या थःगु पहः ताडः वांगु खाँ कुलदिल नपां सम्पदा ल्हवनयता व निजी छैं दानयता सिं छ्यलयगु मति दयानं कायथाय् मदयो थःगु

स्वास्थ्य

ख्वप नगरपालिका वडा नं. १० या रवसालय मचाछैं व दुरुप्यया क्यान्सरया परीक्षण २०७९ चैत्र १० गते जुल ।

अथेहे ख्वप नगरपालिका वडा नं २ या रवसालय चैत्र ११ गते शनिवार दुरुप्य व मचा छ्यां क्यान्सरया परीक्षण शिविर जुल ।

ज्या इवः या मूपाहां ख्वप नगरपालिकाया प्रमुख सुनिल प्रजापति जुं स्थानीय जनताता अःपुक स्वास्थ्य सेवा वियगु तातुडः ख्वप अस्पताल चाय्कागु खाँ व्याकसे ख्वपया कला संस्कृति ल्यंकः म्वाकः तयगु नपां शिक्षा व स्वास्थ्यब्य् जनताता म्हवचा धेबां बांलाक सेवा ब्यूब्यूं कलेज व अस्पताल चाय्कागु खाँ व्याक दिल ।

ख्वप नगरपालिकां याडः च्वंगु ज्यात देया लागिं ब्यस्पलागु जुयो चंगु खाँ कुल दिसे वयकलं अः ख्वप ज्ञान विज्ञानया मू थाय् काथं हज्याडः च्वंगु दः धायो दिल ।

ख्वप नगरपालिका वडा नं. २ या वडाध्यक्ष हरिप्रसाद बासुकलां ख्वप नगरपालिकां दायँ दायँ पतिक स्वास्थ्य शिविर त तं

पहःल्यंकः थाकुयो वगु खाँ नं प्वंकः दिल ।

ख्वप नगरपालिकां इलय्ब्यलय् सिंकःमि, डकःमिया तालिम ब्यू ब्यूं वयो च्वंगु नपां नगरबासीपित्ता लाहातय् ज्या दैगु तालिमत बियो वयो च्वंगया मू तातुना लाहातय् ज्या दः पुं कतया भरय् म्वाय् माली मखुगु खाँ नं वयकलं ब्याकः दिल ।

अथेहे ख्वप जिल्लामा प्र.जि.अ. खगेन्द्र प्रसाद रिजालं ऐतिहासिक व सांस्कृतिक नगर ख्वप देता म्वाकः तय्ता व थानाया कलाकृति ल्यंकः म्वाकः तय्ता हस्तकलाया तालिमं गवाहाली याइगु खाँ काडः दिल ।

वनपैदावार उद्योग व्यवसायी महासंघमा माधव माणि हुमागाइँ नं तालिमं सिंज्या (काळकला) ख्य् दक्षपुं जनशक्ति ब्लानिगु नपां लाहातय् ज्या दैगु खाँ व्याकसे सरकारी कार्यालय स्वदेशी वस्तुता छ्यलयगु यायमः धायोदिल ।

ज्या इवः सं डिभिजन वन कार्यालयया सहायक वन अधिकृत विनिता पाण्डे तालिमया तातुना काडः दिसे ९० न्हूया तालिमय् ४० म्हा प्रशिक्षार्थीत दुतिंगु खाँकाडः दिल ।

ज्या इवः या सभानायो नपां डिभिजन वन कार्यालयया निमित्त डिभिजन वन अधिकृत प्रेम प्रसाद सापकोटां भक्तपुरया नेथाय् तालिम न्ह्याइगु तालिमया मिसा मस्तनं अपलं दुतिंगु लय्ताया खाँ खः धायोदिसे थजगु तालिमय् स्थानीय तह न्ह्यलुवा जूसा बांलाइगु खाँ धायोदिल । ज्या इवः सं नगर प्रमुख प्रजापति जुं ब्यतिकः पुं स्यनामिपुं मध्ये छ्म्हासिता तालिमया ज्या भः लःल्हाड ब्यूगु खः।

शिविर

मपुनिगु ल्वयया बारे अभिमुखीकरण नं याडः वयो च्वंगु खाँ काडः दिल ।

ज्या इवः सं वडाया दुजः श्याम सुन्दर मातां, वडा नं. २ या पार्टी इन्वार्ज राजन जति, जेसिस स्कूलया प्र.अ. जयराम गोर्खाली, डा. शोभानी श्रेष्ठ व वडाया दुजः मञ्जु लाखां नं न्वचु तयो दृगू खः।



गुंभय

ख्वप नगरपालिका पाखं चाय्क तःगू शिशु स्याहार केन्द्र व बाल विकास केन्द्र्या ग्वसालय शनिवार कर्मचारीपुं नपालाय्गु ज्या इवः काथं गुँ भवय डाय्कगु खः ।



उगु ज्या इवः सं ख्वप नगरपालिका प्रमुख सुनिल प्रजापति जुं अवकाश कःपुं कर्मचारी पिन्ता बिदाइ व्यूगु खः । ज्या इवः सं वयकलं शिक्षकपुं समाजनं दय्किपुं खः धायो दिसे शिक्षक, पिनिगु

विस्काजात्रा २०७९/८० या तयारी बैठक

चैत्र १२ ज्ञते

ख्वप नगरपालिकाया प्रमुख सुनिल प्रजापतिया नायो सुई हःन्य् वयो च्वंगु बिस्का जात्रा बालाक हानय्ता स्वापु दःपुं नपां बैठक च्वांसे ख्वपया सांस्कृतिक व ऐतिहासिक बिस्का जात्राया महत्व कुलदिसे जात्रा इलय हे, शान्तिपूर्ण ढह्गं क्वचाय्के मःगु खाँ काडः दिल ।

अथेहे ख्वपया प्र.जि.अ. खगोन्द्र प्रसाद रिजाल नेपःया गौरवया जात्रा विस्कानखा शान्तिपूर्ण व बालाक डाय्केता थःथःगु थासं ग्वाहाली याय्मः धायो दिलसा बैठक्य् गुठी संस्थान भक्तपुरया प्रमुख खिमा ओली, ख्वप नगरपालिकाया जनप्रतिनिधिपुं, इन्दुवक्स गणया प्रतिनिधि, राष्ट्रिय अनुसन्धान विभाग, नेपाल टेलिकम, केयुकेएल, विद्युत प्राधिकरण, रेडक्रस सोसाइटी, भैरवनाथ जात्रा सहयोग समिति व जात्रा नपां स्वापुदः पुं मनूत मुडः क्वय च्वया काथंया खाँ क्वः छ्यगु जुल ।

- १) थुगुसीया बिस्का जात्रा तस्कं बालाक डाय्केता सुचुकुचु नपाँ मःगु व्यवस्था याय्ता स्वापु दः पुं नपां बैठक ख्वप नगरपालिकां तय्गु ।
- २) जात्राया इलय शान्ति सुरक्षाया जिम्मा जिल्ला प्रशासन कार्यालय भक्तपुर जिल्ला प्रहरी परिसर व सुरक्षा निकायता बिय्गु ।

बालागु लिच्चवः मचातय्ता नं लाइगुलिं अमिसं व्यवहारिक व सामाजिक ज्या खाँ नं स्यन्य् मः धायो दिल । ख्वप नगरपालिकाया जनप्रतिनिधिपुं कर्मचारी व स्थानीय जनताया छप्पा छधि व इमान्दारितां ख्वप दे थौं सफल जुय फःगु खाँ व्याकसे शिक्षकपुं ई काथं थः ता हिङ्कः यंक्य् फ्यूमः धायोदिल । ख्वप नगरपालिकां २१ औं शताब्दीया लागिं योग्य पूं नागरिक ब्वलांकय्गु मति शिक्षा, स्वास्थ्य थजगु विषयता हदाय तयो ज्यासाडु वयागु खाँ व्याकसे थः ज्या साडागु थास्य् समर्पित जुयो ज्या सानय्ता घ्वासा बियो दिल ।

अथेहे उप प्रमुख रजनी जोशी ख्वप देया गौरवपूर्ण इतिहास च्वयता थानाया जनताया तहांगु लाहा दः गु खाँ व्याकसे सभ्य व सुसंस्कृत नागरिक ब्वलांकय्ता मचाबलय् निसें बालागु शिक्षा वियमः धायोदिल ।

ज्या इवः सं शिशु स्याहार व बाल विकास केन्द्र्या प्रमुख दिपेन्द्र प्रजापति जुं ख्वप नगरपालिकाया आजु व तातुना पुं वांक्यता सकल कर्मचारी पुं दत्तचित्त जुयो हज्याय् मःधायो दिल ।

- ३) पुजा-आजा व इलय हे जात्रा क्वचाय्केगु जिम्मा गुथि संस्थानता ।
- ४) विस्का जात्रा नपां स्वापु दःगु पूजाआजा व मः गु तयारीया निंति भैलनायो पुं, जात्रा व्यवस्थापन समिति व स्वापु दःगु वडाता जिम्मा बियगु ।



- ५) बिस्का जात्रा न्ह्याइगु नगरया फुक्क थास्या तार, केबुल व फाइबर नेट्या व्यवस्था स्वापु दः पिन्ता याकेगु । उकिता पौ च्वयगु ज्या ख्वप नगरपालिकां याय्गु ।

सचिव खुगूगु ख्वप पौ. बःछि पौ(पाक्षिक)

ख्वप अस्पतालय डा. मल्ल निमित्त मेडिकल डाइरेक्टर

चैत्र १२ गते

ख्वप नगरपालिका पाखं चायकः तःगु ख्वप अस्पतालय हाडजोर्नी व नसारोग विशेषज्ञ डा. मजेश प्रताप मल्ल ख्वप अस्पतालय निमित्त मेडिकल डाइरेक्टर नियुक्त यासे वयक्या लसकुस नपां म्हासिइका ज्या इवः सं ख्वप नगरपालिकाया प्रमुख नपां ख्वप अस्पताल व्यवस्थापन समितिया नायो भाजु सुनिल प्रजापति जूं सञ्चालक समितिया क्वः छिडा खाँ व्याकसे वयक्या कार्यकाल तः लायम धायो भिन्तुना देछायो दिल ।



ज्या इवः सं नगर प्रमुख प्रजापति जूं स्वास्थ्यया लागा तस्कं संवेदनशील जुगुलिं थाना ज्यासानिपुं चिकित्सक व कर्मचारी पिसं जिम्मेवार जुयो ज्या सानय्ता मार्ग निर्देश यासे मथां हे प्रसुति सेवा चायकेगु कुतः जुयो च्वंगु खाँ व्याक दिल ।

तेपः या सरकारं बेलायत्य् १० द्यूम्हा नरसंत छ्वय्यगु श्रम समझदारी बालापुं नरसंपुं प्याहाँ वानिबलय दुर्गम क्षेत्रे स्वास्थ्य सेवा बिय मफैगुलि थजगु ज्या पानय् मः, प्रमुख प्रजापति जूं धायोदिल ।

अथेहे उप प्रमुख रजनी जोशी प्रसुति सेवा चायकेगु नगरपालिकाया न्हपा निसेया तातुना खः धायो दिसे थुकीं जनताता अपलं सेवा जुइगु नपां चिकित्सक व नर्स पिनिगु व्यवहारं नं विरामीपुं

निरीक्षण

चैत्र १२ गते

ख्वप नगरपालिका वडा नं. ८ लिवाली आवास योजनाया लिबाली करिडोरय् लाँ पीच याड च्वंथाय् ख्वप नगरपालिकाया प्रमुख सुनिल प्रजापति स्थलगत निरीक्षण् ।



वन पैदावारमा सीप विकास तालिमया उलेज्या
(२०७९ ईत्र १० गते)



ख्वप कलेज र ख्वप मा.वि. ... सं न्हूँ पुं प्राचार्यपिन्ता लसकुस
(२०७९ ईत्र १० गते)



ख्वप अस्पतालय् डा. मजेश प्रताप मल्ल जू याता लसकुस
(२०७९ ईत्र १२ गते)



विस्का जात्रा तः लाक हानयता स्वापु दःपुं नपां बैठक
(२०७९ ईत्र १२ गते)

